


二十二史攷異

南齊書 梁書 陳書 魏書 三
廿五之九



			九	漢
		三	〇	書
	一	〇	三	門
二	〇	〇	〇	
冊	架	函	號	類

庫文閣內			
元	九		漢
八	三		書
函	〇		
一	〇	三	
架	冊	號	類

內閣文庫			
番號	漢	9303	
冊數	20	(7)	
函號	298	2	



南齊書

淺藏之庫

廿二史攷異廿五

錢大昕學

高帝紀

於是為南蘭陵蘭陵人也 此重言蘭陵者郡縣兼舉

也呂安國廣陵廣陵人曹虎下邳下邳人周盤龍北

蘭陵蘭陵人蕭景先蕭謚蕭坦之蕭惠基皆南蘭陵

蘭陵人張緒吳郡吳人庾易新野新野人劉懷慰平

原平原人皆兼書郡縣之例監本少蘭陵二字蓋刊

書者妄去之州郡志南徐州無南蘭陵郡蓋齊初併

省

南齊書

偽馮翊太守蒲旱子 宋書蕭思話傳作蒲旱子

新安王子鸞有盛寵簡選僚佐為北軍中郎中兵參軍

按子鸞以北中郎將領南徐州刺史太祖為其僚屬當云北中郎中兵參軍此多一軍字

武帝紀

永明六年以宕昌王梁彌承為河涼二州刺史 按齊

高帝父名承之而南琅邪郡有承縣未聞改易至建武三年方省併此宕昌王名彌承亦直書不諱高帝名道成而第六子晃封安成王州郡志有安成郡及夷道熨道利成綏成始成諸縣蓋齊世遵古二名不

偏諱之禮也文惠太子傳轉祕書丞以與宣帝諱同不就此在未受宋禪以前尚沿宋制若受禪以後則官名如中丞左丞右丞之類皆無所避矣薛道淵避太祖偏諱但稱淵陳承叔避宣帝諱改名嗣叔俱在宋世

北兗北徐豫司青冀八州 當為六州或上有脫文

十一年孝子順孫義夫節婦 梁武帝父名順之故子顯修史多易為從字如天文志五星從伏太白從行熒惑從行歲星太白俱從行辰星從行之類宋順帝亦作從帝今汲古閣本惟祥瑞志豫章王疑王琨傳

各兩見劉休傳一見餘篇多作順帝蓋後人所改監
本於此數處亦改爲順字矣百官志漢順帝宋本亦
作從州郡志從陽郡從陽縣汲古閣改爲順陽唯監
本尙是從字而張敬兒陳顯達傳中仍爲順陽陳顯
達傳
南鄉縣故順陽郡
治也宋本作從陽此紀及明帝紀俱有順孫字元本
必作從孫後來校書者以意改易耳

明帝紀

永明五年爲持節監豫州郢州之西陽司州之汝南二
郡軍事右將軍豫州刺史 按州郡志司州汝南郡
寄州治州治卽義陽似非豫州所當兼督而齊世除

豫州者例兼督司州之汝南未審其故

東昏侯紀

永元三年光祿大夫張環鎮石頭 環當作瓌

和帝紀

中興元年以黃門郎蕭澹行荊州府州事 澹當作憺

禮志上

故驃騎大將軍王敬則故鎮東大將軍陳顯達 按敬
則顯達二人此時見存不應加故字校刊者妄意配
饗廟庭之人必已身故謬加此字耳

故太子祔太廟旣無先准 宋順帝諱準故沈約史準

巳陽角皆依納音而言

天文志上

太史令將作匠文孝建陳天文奏曰 文孝建似是人姓名然孝建乃孝武年號不應以命名恐有誤

州郡志上

南徐州鎮京口吳置幽州牧屯兵治焉 按吳孫韶鎮

京口加領幽州牧特寵以虛名非置幽州於此地也

淮陵郡 甄城 按宋州郡志無此縣若云鄆城之譌

則已見南濮陽不當重出也

晉末以廣陵控接三齊故青兗同鎮 按晉南渡僑立

徐兗二州常以一人領之太元十二年朱序以青兗

二州刺史鎮淮陰此青兗同鎮之始序移鎮而譙王

恬王恭相代爲青兗二州刺史皆鎮京口不聞治廣

陵也桓元以桓宏爲青州刺史治廣陵不兼兗州及

劉裕平桓氏自領徐青兗三州後又以兗州授劉藩

青州授諸葛長民兩鎮仍分而長民還治京口及劉

藩誅而劉道憐復爲青兗二州刺史鎮京口義熙八

年檀祗爲青州刺史鎮廣陵又不兼兗州祗卒而劉

懷慎代之亦不兼兗州此云青兗同鎮者謂義熙末

兩刺史同治廣陵非以一人兼領也宋初省青入兗

而廣陵常爲南兗州治所矣

有平陽石鼈田稻豐饒所領惟平陽一郡 據下文當

爲陽平郡轉寫顛倒耳周山圖傳亦云於石鼈立陽

平郡

陽平郡寄治山陽 按陽平郡治石鼈在山陽境內

州郡志下

梁州當帶南秦州刺史 當蓋常字之譌

百官志

國相 當作相國

諸曹有錄事記室戶曹倉曹中直兵外兵騎兵長流賊

曹城局法曹田曹水曹鑿曹集曹右戶十八曹 今

數之止十六曹

凡諸小號亦有置府者 冠軍以下皆小號將軍也若

出鎮方州則亦開府置官屬罷鎮則止

自令僕以下五尙書八座 令僕射并吏部度支左民

都官五兵祠部六尙書爲八座若置左右僕射則減

祠部尙書一人亦八座也

領軍將軍 晉宋以來將軍有二等自驃騎至龍驤將

軍皆虛號非持節出鎮不得領兵此領護左右衛驍

游前後左右軍將軍則皆主兵之官也

皇后傳

宣孝陳皇后魏司徒陳矯後 當云司徒矯不宜更安

陳字崔祖思傳稱崔琰七世孫

豫章王嶷傳

太祖帶南兖州鎮軍府長史蕭諱在鎮憂危既切期渡
江北起兵 監本但云太祖在鎮無帶南兖州以下
十一字惟汲古閣本有之按是時齊祖爲中領軍在
都參機務雖領南兖州刺史鎮軍將軍初不之鎮故
以長史蕭順之行州府事而蒼梧凶暴齊祖恐不自
全故又欲還鎮起兵南兖州治廣陵故云江北也若

云太祖在鎮則已到江北無緣更欲渡江且與下意
矛盾矣蓋史之難讀由于校書者之無學而任意刪
改如此者不少矣

第四子子行洮陽侯早卒子元琳嗣 按嶷子十六人

長子子廉諡哀世子未及嗣爵嗣豫章之封者嶷孫
元琳也南史以元琳爲子廉之子今乃係元琳子洮
陽侯子行之下似元琳爲子行之子而嗣封洮陽矣
子顯嶷之第八子述其家事不宜有誤蓋文簡而意
不達爾

堂堂烈考德邁前蹤 嶷爲子顯之父故有烈考之稱

然傳中序列諸子不及子顯名

褚淵傳

父湛之驃騎將軍尚宋武帝女始安哀公主 按湛之

初尚始安公主繼尚吳郡公主見淵弟澄傳吳郡亦

武帝女

淵少有世譽復尚文帝女南郡獻公主 按下文云淵

妻宋故巴西公主一傳之中前稱南郡後稱巴西而

王儉撰淵碑文又云選尚餘姚公主餘姚縣名南郡

巴西皆郡名蓋由縣主進封郡主而南郡巴西前後

互異又何說也

王儉傳

儉察太祖雄異先於領府衣裾 時齊祖為中領軍故

云領府

天應人順 人順宋本作民從

柳世隆傳

出為虎威將軍 監本作武威

輔國將軍驍騎將軍蕭諱 汲古閣本注鸞字今以宋

書沈攸之傳攷之乃蕭順之非齊明帝也順之梁武

之父故諱其名

垣崇祖傳

攷異

南齊書

敕崇祖修治苟陂田 苟當作芍

張敬兒傳

乃以敬兒為持節督雍梁二州郢司二郡軍事 按雍州刺史常兼督郢州之竟陵司州之隨郡非盡督郢司二州也柳世隆傳稱持節督雍梁二州郢州之竟陵司州之隨郡諸軍事征虜將軍寧蠻校尉雍州刺史新除鎮軍將軍張敬兒蓋得其實此傳但云郢司二郡殊未核也敬兒初鎮雍州官征虜將軍本傳亦未之及

于敬則傳

敬則之來聲勢甚盛裁少日而敗時年七十餘 按南

史時年六十四

劉懷珍傳

平胡中郎將 王元載為徐州刺史亦帶平胡中郎將

而宋齊志俱未載此官名

李安民傳

祖疑衛軍將軍 子顯父名疑此書於疑字亦不避

王元邈傳

泰始初遷輔國將軍清河廣平二郡太守幽州刺史

按宋州郡志未見僑立幽州之文蓋僑置未久而於

廢也

劉善明傳

族兄乘民

按善明父名懷民而族兄亦名乘民乘民

子又名懷慰蓋疏屬不相回避

乘民病卒 按劉懷慰傳云父乘民死於義嘉事難與此互異當有一誤

出為輔國將軍西海太守行青冀二州刺史

按宋州郡志泰始七年割贛榆置鬱縣立西海郡隸僑青州

故善明以西海太守行青冀二州刺史也齊志無西

海郡蓋後來併省

封新塗伯

塗當作淦

蘇侃傳

蘇侃字休烈

祥瑞志侃作侃侃即侃之俗體侃字休烈而弟名烈亦可疑也

周盤龍傳

北蘭陵蘭陵人也宋世土斷屬東平郡

按史稱南蘭陵者南徐州之蘭陵也稱北蘭陵者徐州之蘭陵也

宋志徐州蘭陵郡領昌慮承合鄉三縣不見蘭陵縣

疑志有脫漏矣宋泰始以後淮北陷沒僑立淮南土

斷改屬東平故齊志無北蘭陵之名也

薛淵傳

明帝遷右軍司馬 此時明帝尙未卽位當有舛譌攷

明帝紀永明五年爲右將軍豫州刺史淵殆爲其府

司馬耳當云遷明帝右軍司馬

轉大司馬濟陽太守 按齊世除大司馬者唯豫章王

焜王敬則二人非淵所得授此蓋蒙上右軍司馬之

文由右軍司馬轉爲大司馬府之司馬也

桓康傳

以康爲持節督青冀二州東徐之東莞琅邪二郡胸山

戍北徐之東海漣口戍諸軍事青冀二州刺史 按

州郡志止有南徐北徐初無東徐之名惟青州有東

莞琅邪二郡治胸山蓋齊初嘗別爲東徐矣志又稱

建元初以東海郡屬冀州今攷桓康出鎮在建元四

年其時東海尙屬北徐雖爲青冀刺史所督猶未改

隸冀州志所書恐非其實

曹虎傳

遷南中郎司馬加寧朔將軍南新蔡太守永明元年徙

爲安成王征虜司馬餘官如故 按安成王暠以建

元四年出爲南中郎將江州刺史永明元年進號征

虜將軍虎蓋由員外常侍出爲暠府司馬南新蔡江

州屬郡故府僚得兼領之也鬲旣進號征虜將軍而
虎仍爲其府司馬府名雖改職事如故傳乃云徙爲
安成王征虜司馬似南中郎別是一人矣當云遷安
成王南中郎司馬次云隨府轉征虜司馬於例乃協
二年進督爲監 宋書百官志晉世都督諸軍爲上監
諸軍次之督諸軍爲下

王僧虔傳

巴峽流民多在湘土僧虔表割益陽羅湘西三縣緣江
民立湘陰縣從之 按湘陰置縣在宋明帝時宋書
州郡志失載

臨川王映傳

仍復爲冠軍將軍南兖州刺史假節都督復爲監軍督
五州如故 此亦進督爲監也上文假節都督字兩
見俱當爲假節督誤衍都字耳

長沙王晃傳

遷爲持節監豫司二州之西陽諸軍事西中郎將豫州
刺史 當云監豫司二州郢州之西陽諸軍事傳脫
郢州之三字

劉悛傳

彭城安上里人也彭城劉同出楚元王分爲三里以別

宋氏帝族 按宋武帝出自彭城綏里其二里則安
上叢亭也宣帝子躡為楚孝王其曾孫居巢侯般般
子太尉愷愷子司空茂徙居叢亭里唐時知幾秩迅
皆其裔也叢亭劉雖出自漢却非楚元王之後
魚復侯子響傳

都督豫州郢州之西陽汝南二郡軍事冠軍將軍豫州
刺史 按州郡志郢州但有汝南縣隸江夏郡而無
汝南郡以明帝紀崔慧景王廣之蕭遙欣蕭遙昌諸
傳證之知當云司州之汝南傳脫司州之三宇

進南豫州之歷陽淮南潁川汝陽四郡 進下當有督

字州郡志潁川汝陽二郡皆屬豫州不屬南豫

巴陵王子倫傳

永明十年遷北中郎將南琅邪彭城刺史二郡太守

刺史二字衍蓋罷南豫而領兩郡守也

周顥傳

益州刺史蕭惠開賞異顥攜入蜀為厲鋒將軍帶肥鄉

成都二縣令 按宋齊二志成都無肥鄉縣

徐孝嗣傳

竝為太子劬所殺 汲古閣本無太字注云宋本作太
祖予謂太祖乃太初之謚元凶僭號改元太初史敘

元凶朝事多稱太初王僧虔傳云兄僧綽爲太初所
害與此文同刊本譌爲太祖後人以意改爲太子劭
耳

蕭遙欣傳

仍爲督豫州之西陽司州之汝南二郡輔國將軍豫州
刺史 當云督豫州郢州之西陽司州之汝南二郡
傳有脫文

王秀之

出爲晉平太守 按宋書明帝紀泰始四年山陽王休
祐改封晉平王改晉安郡爲晉平郡而宋齊州郡志

並不載晉平之名此史之漏也據子顯書王秀之虞
愿邱仲起皆爲晉平太守張融與吏部尙書王僧虔
書云阮籍愛東平土風融亦欣晉平閑外皆宋季事
至齊武帝卽位封子子懋爲晉安王則晉平復爲晉
安當在齊初矣

陸慧曉傳

未嘗卿士大夫或問其故慧曉曰貴人不可卿而賤者
可卿 汲古閣本卿作輕誤

謝朓傳

沈昭略謂朓曰卿人地之美無忝此職但恨今日刑于

寡妻 按文義當以眺妻懷刀欲殺之故援刑于語以相譴南史改云但恨不可刑于寡妻詞拙而意淺矣此云沈昭略南史以為范縝亦異

王奐傳

祖僧朗宋左光祿儀同 當云左光祿大夫開府儀同

三司史省文

江夏王寶元傳

少帝送少姬二人與之 按江夏王寶元鄱陽王寶夤二傳皆前稱東昏後稱少帝裴叔業傳稱東昏為少主魏虜傳亦稱少帝蕭坦之傳稱鬱林王為少帝茹

法亮傳二少帝竝居西殿謂鬱林與海陵也梁書江

淹傳前稱蒼梧王為少帝後稱鬱林王為少帝

鄱陽王寶夤傳

中興二年謀反誅 按寶夤起兵不克犇魏事見魏史

此云誅者據梁人之詞以為寶夤已死其在魏者偽也魏書作寶寅不从夕據其字智亮當以寅為是

文學傳

祖沖之 唐世冬至日在合宿之左五十許度伐之初

即秦歷 宋志云漢代之初即用秦歷此譌代為伐

又脫漢用二字合當作今

良政傳

劉懷慰

平原平原人

按劉懷珍劉善明二傳俱云

平原人此獨書平原平原於例亦未畫一

高逸傳

顧歡

道士與道人戰儒墨道人與道士辯是非

按

六朝呼僧爲道人宋書後廢帝紀晚至新安寺就曇

度道人飲酒廬陵王義真傳與慧琳道人周旋異常

西南夷傳有曇標道人與羌人高闍謀反又有慧嚴

慧議道人並在東安寺齊書孝義傳誌公道人魏虜

傳元高道人道人法秀南史東昏侯紀蔣山定林寺

一沙門病不能去爲軍人所得應時殺之左右韓暉

光曰老道人可念梁后妃傳瑤光寺智遠道人宋宗

室傳前稱慧琳道人後稱沙門慧琳梁宗室傳道人

釋惠思恩倖傳宋時道人楊法持與高帝有舊昇明

中以爲僧正海南諸國傳宋世名僧有道生道人又

有慧嚴慧議道人是道人卽沙門之別稱不通於羽

士此傳云道士與道人戰儒墨而南史陶貞白傳亦

云道人道士並在門中道人左道士右則道人與道

士之別較然矣

孝義傳

文選

南齊書

三

吳欣之 晉陵利城人也 按利城縣本屬東海晉南
渡僑立江南宋齊州郡志俱屬南東海郡

魏虜傳

雍州涼州秦州沙州涇州華州岐州河州西華州寧州
陝州洛州荊州郢州北豫州東荊州南豫州西兖州
東兖州南徐州東徐州青州齊州濟州二十五州在
河南湘州懷州秦州東雍州肆州定州瀛州朔州并
州冀州幽州平州司州十三州在河北 按自雍至
濟數之止廿四州蓋脫一州也據通鑑注則濟州之
下當有光州然以魏收地形志攷之光州延興五年

改爲鎮景明元年復子顯所載者魏太和初之疆域
其時似不當有光州矣河南有秦州而河北又有秦
州亦必有誤湘當作相

世號爲索干都 索干卽桑乾之轉

目錄序

臣等因校正其譌謬 今本南齊書卷十五州郡志下
卷卅五高十二王傳卷四十四徐孝嗣傳卷五十八
高麗傳各闕一策卷五十九史臣論亦有闕文曾子
固序但云校正譌謬不云文有脫落則宋時蕭史固
完善也又按史通序例篇云沈宋之志序蕭齊之序

錄雖皆以序為名其實例也則子顯書當有序錄一篇劉知幾猶及見之而今失其傳矣晉書亦有序例一篇今本皆無之

臣恂臣寶臣臣穆臣藻臣洙臣覺臣彥若臣鞏 此序曾鞏所作其云彥若者趙彥若也覺者孫覺也洙者孫洙也藻者錢藻也寶臣者丁寶臣也

南齊書

梁書

廿二史攷異廿六

錢大昕學

武帝紀上

仰生太傅望之 當云太子太傅脫太子二字

隸江州刺史王廣 當云王廣之脫之字

魏帝自率大眾 此稱魏帝下文又稱魏主於例必不

書一

獸跡其閒 思廉避唐諱凡虎字皆改為獸或為武此紀獸跡天獸獸步獸牙神獸門仁獸闕獸而傅翼皆本虎字回避改易而篇中又有持白虎幡勢同履虎

餌之虎口虎賁之士尅虎牢城云云皆明人不學擅
改本文也

先是東昏以劉山陽爲巴陵太守 按蕭穎達柳忱傳
竝作巴西

以豫州之梁郡歷陽南徐州之義興揚州之淮南宣城
吳興會稽新安東陽十郡 今數之止九郡蓋脫一
郡

齊聖廣淵 梁陳書避唐諱皆改淵爲溪此淵字蓋後
來校書者所改 劉峻傳墜
之淵泉

武帝紀中

天監三年八月魏陷司州詔以南義陽置司州 按是
歲司州刺史蔡道恭爲魏人所圍曹景宗不能救道
恭卒城遂陷四年以鄭紹叔爲司州刺史紹叔傳云
義陽爲魏所陷司州移鎮關南紹叔創立城隍廣田
積穀招納流民百姓安之紹叔所治卽南義陽也其
六年紹叔徵還以馬仙琕代之七年魏人以懸瓠城
內附詔仙琕以兵赴之旣而魏人破懸瓠仙琕退走
魏軍進據三關明年仙琕徵還以夏侯亶持節督司
州諸軍事司州刺史領安陸太守蓋自南義陽徙鎮
安陸也十二年亶召還當以張惠紹代之其後惠紹

徵還而康絢代之並領安陸太守絢以天監十八年
徵還代之者未審何人普通七年除夏侯夔持節督
司州諸軍事司州刺史亦領安陸太守大通二年魏
郢州刺史元願達以義陽內附詔改爲北司州以夔
爲刺史兼督司州蓋梁之失義陽計二十有五年而
復得之中大通二年夔徵還而除陳慶之都督南北
司西豫豫四州諸軍事南北司二州刺史自是義陽
復爲重鎮

山年五月張惠紹克魏宿預城按宿預城得而不能
守紀但書克不書陷此史臣粉飾之詞

九年正月以輕車將軍晉安王諱簡文爲南兗州刺史

按簡文帝紀天監八年爲雲麾將軍領石頭戍事
九年遷使持節都督南北兗青徐冀五州諸軍事宣
毅將軍南兗州刺史不云嘗爲輕車將軍也

十二年閏月特進中軍將軍沈約卒按約傳但云爲
特進左光祿大夫侍中行太子少傅不云除中軍將
軍今攷南史本傳稱加特進遷中軍將軍丹陽尹侍
中特進如故則傳有脫文矣

武帝紀下

普通四年六月分霍州置義州按紀書普通二年義

州刺史文僧明以州叛入於魏則義州之名先已有之

中大通元年五月魏主元子猷棄洛陽 子猷當作子攸陳慶之傳亦作子攸

六年三月以行河南王可沓振為西秦河二州刺史河南王 按可沓振名不見諸夷傳

太清元年二月魏司徒侯景求以豫章章字廣顯洛陽

當作揚 西揚東荆北荆襄東豫南兖西兖齊等十三州

內屬 按侯景傳載景降表云與豫州刺史高成廣

州刺史暴顯潁州刺史司馬世雲荊州刺史郎椿襄

州刺史李密兖州刺史邢子才南兖州刺史石長宣

齊州刺史許季良東豫州刺史邱元征洛州刺史朱

渾願揚州刺史樂恂北荊州刺史梅季昌北揚州刺

史元神和等今本脫去暴顯以下十四字據通鑑攷異補入朱渾願攷異作余朱渾願當

從此十三州之名也紀有西揚傳作北揚紀有東荆

傳但云荆未審誰是

二年九月景寅 唐人修史避諱改丙丁之丙為景今

監本梁書皆作丙蓋後來校書者所改獨此年九月

景寅十一月景戌簡文帝紀大寶二年四月景子元

帝紀太清三年九月景寅數處偶未改易汲古閣本皆用景字

元帝紀

太子舍人蕭歆 歆當作韶

式哥且誦 哥古歌字

何必西瞻虎據 此卷內獸首緹騎為獸傳翼如貔如

獸諸獸字皆虎字也此虎據字又明人所改

敬帝紀

太平二年正月分尋陽太原齊昌高唐新蔡五郡置西

江州即於尋陽仍充州鎮 按尋陽本江州治所侯

瑱為刺史移鎮豫章瑱為余孝頃所敗詰闕孝頃遂

據新吳稱刺史故此紀稱孝頃為南江州刺史而陳

書周文育傳稱為新吳洞主也西江州之設蓋以備

孝頃其刺史疑即周文育為之故孝頃疑懼舉兵

以應蕭勃及孝頃退走即正授文育江州刺史也隋

志不載西江州之名亦以其不久即廢也梁時置太

原郡于彭澤縣齊昌郡今蘄州高唐郡今宿松縣新

蔡郡今黃梅縣地

史臣侍中鄭國公魏徵曰 按思廉修梁陳書皆因其

父察所撰而續成之梁史諸論述其父說必稱陳吏

部尚書姚察曰仿孟堅漢書稱司徒掾班彪之例也

其但稱史臣者出自思廉新意惟列傳第二十七王

僧孺四人論稱史臣陳吏部尚書姚察疑是傳刻之
誤察非唐臣不應係以史臣之名也陳書惟高祖世
祖二紀論爲姚察所作餘皆思廉自撰本紀終篇別
有總論一篇出於魏徵之手徵亦同時兼領史局者
故稱史臣而著其名梁陳二史俱有史臣侍中鄭國
公魏徵總論一篇北齊書稱鄭文貞公魏徵總而論
之云云蓋百藥本紀已亡後人取北史補之李延壽
進史之時魏鄭公已先歿故稱其諡也周隋二史皆
無魏徵總論豈本有而後來失之乎陳書張貴妃傳
末稱史臣侍中鄭國公魏徵攷覽記書參詳故老云
云凡六百餘言以大臣領史事而不攘人之善以爲
已作鄭文貞洵不可及矣

后妃傳

高祖德皇后郝氏 歸葬南徐州南東海武進縣東城
里山 按太祖后張氏傳稱葬武進縣東城里山此
傳并詳其州郡史家之例當前詳而後略今乃前略
而後詳何也

丁貴嬪 普通七年十月庚辰薨 武帝紀作十一月
傳誤

徐妃之無行自致殲滅宜哉 按徐妃失行不見於本

傳而論忽及之疑傳文有漏落也

哀太子大器傳

中大通三年封宣城郡王 武帝紀作四年

太清三年六月癸酉立為皇太子 簡文紀作丁亥

王茂傳

歷後行軍參軍 當云後軍行參軍傳寫慎倒尔

開府同三司之儀 諸紀傳除儀同者或書開府儀同

三司或書開府同三司之儀似有區別據此傳先書

開府同三司之儀本紀亦同而詔書直稱開府儀同三司

則是文異而實同也

蕭穎達傳

起家冠軍兄穎胄齊建武末亦為西中郎外兵參軍俱

在西府 按夏侯詳傳稱南康王長史蕭穎胄柳忱

傳亦稱西中郎長史蕭穎胄夏侯亶傳稱長史蕭穎

胄則其時穎胄實以長史行州府事非外兵參軍也

起家冠軍句亦不成文疑此段文有脫落或穎胄為

長史而穎達為外兵參軍乎

楊公則傳

魯山城主孫樂祖魯本或作曾誤 武帝紀作張樂祖

鄧元起傳

蕭藻將至 上云蕭淡藻此但云蕭藻者本名淵藻以
避諱或改爲淡或省一字猶貞陽侯淵明或單稱明
或稱淡明也

范雲傳

南鄉舞陰人 按宋齊二志俱無南鄉郡而有南鄉縣
爲順陽郡治所舞陰則南陽之屬縣也蓋梁時避武
帝父諱改順陽郡爲南鄉耳

我與范尚書少親善申四海之敬 蓋用論語四海之
內皆兄弟語

沈約傳

初約久處端揆有志台司 六朝人以僕射爲端揆台
司謂三公也

貴則景魏蕭曹 景魏謂丙吉魏相也許懋傳湯又不
應傳外景外景卽外丙思廉避唐諱改

張穆傳

時雍州刺史曹武度樊城岸以穆知州事 據此則知
州之名六朝時已有之但不過權攝之稱非如宋世
竟爲正官也

王瑩傳

復爲黃門侍郎司馬 司馬者驃騎府之司馬也蓋蒙

文選

梁書

上驃騎長史之文

馬仙琕傳

豫州人白早生殺其刺史琅邪王司馬慶曾 安成王

秀傳作司馬悅

推鄉人胡遊為刺史 本紀作胡遜

十一年遷持節督豫北豫霍三州諸軍事信武將軍豫

州刺史領南汝陰太守 是時豫州治合肥南汝陰

郡亦僑置于合肥馮道根傳天監八年假節督豫州

諸軍事豫州刺史領汝陰太守亦當為南汝陰史缺

南字耳道根徵還而仙琕代之

宗夬傳

宗夬字明敷 蓋取夬揚于王庭之義諸本作史誤

祖景 景即炳字南史避唐諱稱少文而不名

父繁西中諮議參軍 西中下脫郎字

隆昌末少帝見誅 按江淹宗夬二傳俱稱鬱林王為

少帝

劉坦傳

天監三年遷西中郎卒 宋齊以後四中郎將皆皇子

弟為之庶姓無除授者坦蓋由平西司馬遷西中郎

司馬耳

劉季連傳

逐遂寧太守譙希淵 此卷內淵字屢見皆校書者所

改陳伯之子虎牙本紀改作獸牙此卷仍書虎牙亦

非思廉元本 王志傳褚淵為司徒

王志傳

志家世居建康禁中里馬蕃巷 馬蕃南史作馬糞

王泰傳

仍遷仁威長史南蘭陵太守行南康王府州國事王遷
職復為北中郎長史行豫章王府州國事太守如故

按天監十年以南康王績為都督南徐州刺史進

號仁威將軍十六年徵還以豫章王綜為北中郎將

南徐州刺史泰先為南康王長史繼為豫章王長史

六朝時府僚多領郡縣職泰在南徐為幕僚之長故

領南蘭陵太守南蘭陵本隸南徐州也凡諸王冲幼

出鎮開府多以長史行州府事或府王以事宅出亦

以府僚行事楊公則為湘州刺史帥師赴夏口以劉

坦為輔國長史行湘州事是也

張充傳

張緒少有清望誠美選也然東士比無所執 東士句

頗難解南史云南士由來少居此職較明白

柳暉傳

琅邪王元長見而嗟賞 按柳暉徐勉二傳於王融皆字而不名疑當時避齊和帝諱史家未及更易

臨川王宏傳

天監四年高祖詔北伐以宏爲都督南北兗北徐青冀豫司霍八州北討諸軍事 按武帝紀天監六年分豫州置霍州則其時尚無霍州 會征役久有詔班師 梁史於宏洛口潰師之役皆諱而不書不如南史之直筆

長沙嗣王業傳

高祖長兄懿之子也懿字元達 按長沙王懿以忠獲咎齊書既不爲立傳其在梁朝猶光武之伯升也史僅附見其子業傳而敘事亦多脫落其自益州罷還爲西中郎長史行郢州事武帝遣張宏策說以自全之計固執不從雖別見本紀及宅傳乃并郢州行事亦失書之

周捨傳

南津獲武陵太守白渦書 南史作始興相白渦

徐勉傳

徐勉少而厲志 按勉與周捨同傳而論不及捨一字

不無偏枯之病何敬容與謝舉同傳論亦不及舉

明山賓傳

庾桑方有係 庾疑庚之譌

殷鈞傳

南郡范雲 南郡當作南鄉

裴之橫傳

又隨僧辯追景平郢魯江晉等州 按魯晉一州本紀

失書建立年月

夏侯亶傳

都督豫州緣淮南豫霍義定五州諸軍事 按本紀失

書定州建立年月安成王秀傳司州叛蠻田魯生弟

魯賢超秀據蒙籠來降以超秀為定州刺史魏收志

南定州蕭衍置治蒙籠城即隋之麻城縣也

夏侯夔傳

譙州刺史湛僧智圍魏東豫州刺史元慶和于廣陵

此廣陵乃魏僑立之廣陵魏書地形志東豫州太和

十九年置治廣陵城隋志汝南郡之新息縣後魏置

東豫州即廣陵城所在矣武帝紀中大通四年改魏

南兗州為譙州

以羊鴉仁為刺史即今亳州

據此傳則譙州之名

先已有之但不知治于何所耳

二年魏郢州刺史元願達請降 按上文云八年者普通之八年也此云二年則大通二年也本紀普通無八年蓋其年三月即改元大通傳既不言改元則二年上須添大通字

轉使持節督豫淮陳潁建霍義七州諸軍事 按淮陳

潁建四州本紀失書建立年月据隋志汝南郡之新息縣後魏置東豫州梁改西豫州又改淮州而汝南之城陽縣有廢白狗縣梁時亦置淮州汝陰郡之潁陽縣梁時爲陳州陳留郡而汝南郡之朗山縣梁時亦置陳州未知夔所督者何地也潁州即汝陰郡汝

陰縣建州即弋陽郡之殷城縣地義州即弋陽郡之定城縣地

刺史蕭淵明引爲府長史淵明彭城戰歿 此戰歿謂

沒于魏非身死也思廉避唐諱當云湊明此傳及傳

岐王僧辯侯景諸傳作淵明皆校書者所改謝徵傳臨汝侯

淵猷

南康王會理傳

都督南北兗北徐青冀東徐譙七州諸軍事 按東徐

州之名本紀未見攷魏志東徐州蓋置於宿豫郡

廬陵王續傳

又出為使持節都督荆郢司雍西北秦梁巴華九州諸軍事荊州刺史 按西秦疑是南秦之謬巴華二州建立年月本紀失書據杜崱傳父懷寶官至梁州刺史大同初魏梁州刺史元羅舉州內附懷寶復進督華州則華州蓋置于大同初矣華州之名隋志亦無之

邵陵王綸傳

時年三十三百姓憐之 按綸被害在大寶二年辛未距天監十三年甲午始封之歲已三十八年矣史稱年三十三必誤也且梁武諸子綸次居六元帝次居七元帝生於天監七年綸既長於元帝計其卒時最少亦當四十四五歲也

陳慶之傳

又表省南司州 按慶之卒于大同五年而羊鴉仁傳大同七年除都督南北司豫楚四州諸軍事北司州刺史則其時尚有南司州至太清元年鴉仁始為司豫二州刺史鎮懸瓠南司之省蓋在太清初慶之歿已久矣

蘭欽傳

中昌魏人也 按南齊書州郡志梁州有東昌魏郡又

新城郡有昌魏縣初不見中昌魏之名

西魏相宇文黑泰 本名黑獺獺泰聲相近

王僧孺傳

起為安西成王參軍 此句有脫誤

張率傳

與晉安王諱今日近張新安又致故其人才筆宏雅亦

足嗟惜隨弟府朝東西日久尤當傷懷也比人物零

落特可潛慨屬有今信乃復及之 此語已見到洽

傳

劉孝綽傳

范雲年長繪十餘歲其子季才與孝綽年並十四五

按范雲傳子孝才嗣孝季字形相似疑即一人

先聖以眾惡之必監焉眾好之必監焉 此用論語改

察為監避其家諱也

張纘傳

改為使持節都督湘桂東寧三州諸軍事湘州刺史

按東寧州之名本紀亦失書隋志始安郡義熙縣舊

曰齊熙置齊熙黃水二郡及東寧州

都督雍梁北秦東益郢州之竟陵司州之隨郡諸軍事

按諸夷傳大同元年尅復漢中楊智慧遣使上表

求率四千戶歸國詔許焉卽以爲東益州蓋北秦東益二州皆仇池楊氏之地

蕭子恪傳

所謂殷鑒不遠在夏后之代 按思廉修史在貞觀之世於太宗偏名初不回避此文改世爲代乃高宗以後人轉寫遂易非梁史元本

蕭子範傳

其年葬簡皇后使與張纘俱製哀策文 今以纘傳攷之其時纘未能還都無緣有製文事

謝舉傳

世人爲之語曰王有養炬謝有覽舉養炬王筠王泰小字也 此語已見王筠傳不應重出

何敬容傳

祖攸之宋太常卿 按南史敬容之祖攸之位侍中與此異南齊書亦作攸之疑此傳誤也儒林傳有何攸之蓋別是一人同姓名者

朱异傳

論 朱异賀瑛並起微賤 按賀瑛直言時政非權倖也 尤不宜與朱异合傳

元法僧傳

文是

梁書

十六

都督廣越交桂等十三州諸軍事 十三州之名紀傳

俱未詳

元願達傳

仕魏為中書令司州刺史 本紀作郢州刺史此誤魏

之郢州與梁之司州本一地但地從主人不可假借也

王神念傳

歷武陽宣城內史 武陽疑武陵之譌

羊侃傳

時秦州羌有莫遮念生者 莫遮魏書作莫折聲之轉

也

除西晉州刺史破郭元建于東關遷使持節信武將軍

東晉州刺史 按東西晉二州當是元帝所置隋志

同安郡梁置豫州後改曰晉州初不見東西之名

羊鴉仁傳

都督南北司豫楚四州諸軍事 按本紀失載楚州建

立年月魏志西楚州蕭衍置治楚城領汝陽仵城城

陽三郡卽此楚州也

詔鴉仁督士州刺史桓和之仁州刺史湛海珍等 按

士仁二州本紀未載建立年月武帝紀稱兗州刺史

桓和

仍為都督豫司淮冀殷應西豫等七州諸軍事司豫二州刺史 按冀殷應諸州本紀未詳置立年月隋志項城縣東魏置揚州梁改殷州即鴉仁所督之殷州也

到溉傳

彭城武原人 按溉與弟洽各立傳洽傳云彭城武原人也宋驃騎將軍彥之曾孫祖仲度驃騎江夏王從事中郎父坦齊中書郎溉傳又云彭城武原人曾祖彥之宋驃騎將軍祖仲度驃騎江夏王從事中郎父

坦齊中書郎溉從父弟沆傳又云彭城武原人曾祖彥之宋將軍何其詞之不憚煩也當依謝舉王承二傳之例乃為簡而有法

頃之坐事左遷金紫光祿大夫 按金紫光祿大夫似非左遷之官

許懋傳

又禮記云三皇禪奕奕謂盛德也五帝禪亭亭謂特立獨起于身也三王禪梁甫連延不絕父沒子繼也 按禮記無此文當作禮說禮說者禮緯也下文云異乎禮說可證記為說之譌矣亭之言特梁之言連皆

取聲相近

鄭元有參柴之風論語柴也愚參也魯蓋譏其愚魯
劉孺傳

彭城安上里人也列傳例書郡縣此書里而不書縣
亦變例

尋陽王大心傳

出為使持節都督郢南北司定新五州諸軍事本紀
不見新州之名隋志江夏郡舊置郢州梁分置北新
州即此新州也

王僧辯傳

率巴州刺史淳于量定州刺史杜龕宜州刺史王琳

州刺史裴之橫等按隋志巴陵郡梁置巴州鬱林

郡梁置定州亦稱南定州夷陵郡梁置宜州惟桂陽郡云

平陳置郴州不云梁所置裴之橫傳亦不云為郴州

刺史疑此傳誤也梁時益部亦有巴州治閬中又謂

之北巴州司部亦有定州蠻田氏所據

世祖乃命羅州刺史徐嗣徽武州刺史杜顛按隋志

湘陰縣梁置羅州武陵郡梁置武州下邳郡梁亦置

武州據前傳由武州刺史遷鎮蠻護軍武陵內史則

必武陵之武州矣

徐文盛傳

督梁南秦沙東益巴北巴六州諸軍事仁威將軍秦州刺史 按晉宋以來梁秦二州同治漢中都督常兼領二州刺史天監三年夏侯道遷叛而梁失漢中地乃移梁州於西城大同元年漢中復為梁有隋志西城郡梁置梁州據天監三年以後言之也又云尋改曰南梁州則據大同元年以後梁州復治漢中當以西城為南梁矣文盛除秦州未知治所然受命東討初未之任也

杜岸傳

世祖以為持節平北將軍北梁州刺史 按隋志未見北梁州之名蓋大同初梁州復治漢中以西城為南梁而漢中遂有北梁之稱

杜龕傳

世祖以為持節忠武將軍鄭州刺史 按鄭州之名本紀及隋志俱失書龕叔幼安世祖以為西荊州刺史西荊州亦隋志所失載也

孝行傳

劉曇淨 彭城莒人也 按彭城郡無莒縣 莒屬東莒 當作呂

攷異

劉霽 父聞慰齊工員郎 工當作正

弟杳在文士傳 文士當作文學

文學傳上

劉昭 歷為宣惠豫章王中軍臨川記室 臨川下脫

王字

何遜 東海剡人也 剡當作郊

周興嗣 河南獻舞馬詔興嗣與待詔到沈張率為賦

高祖以興嗣為工 按張率傳云高祖以率及興嗣

為工且傳中載賦全篇則率之賦尤工於興嗣矣且

亦重出

文學傳下

劉峻 父珽宋始興內史 珽南史作琰之魏書劉休

賓傳作旋之

劉杳 祖乘人宋冀州刺史 按杳與霽歆昆弟三人

一在孝行傳一在文學傳一在處士傳霽傳云平原

人祖乘民宋冀州刺史父聞慰齊正今本作工誤員郎杳

傳云平原人祖乘人宋冀州刺史父懷慰齊東陽太

守有清績在齊書良政傳歆傳云祖乘民宋冀州刺

史父聞慰齊正員郎文既重杳而或云聞慰或云懷

慰名亦互異乘民之為乘人蓋避唐諱改易然思廉

攷異

梁書

三

史成于貞觀之世於太宗二名初未偏諱此人字後人據南史改之非思廉本文

謝徵 徵當為微字之譌

又為臨汝侯淵猷製放生文 淵當為溪此後人所改處士傳

孟子曰今人之於爵祿得之若其生失之若其死 今

本孟子無此文

何點傳

亦隱居吳郡獸邱山 獸邱即虎邱避諱改

初褚淵王儉為宰相 唐人避諱改淵為溪褚淵或稱

其字南史載此文云回既世族此作淵亦後人所改

何子季傳

今遣領軍司馬王果 王果南史作王杲之

止足傳

魚豢魏略知足傳方田徐于管胡則其道本異謝靈運晉書止足傳先論晉世文士之避亂者殆非其人惟阮思曠遺榮好遁遠恥辱矣宋書止足傳有羊欣王徽咸其流亞 按魚豢謝靈運之書今已不傳魚書蓋以田疇徐庶管寧胡昭四人標為知足也沈約宋書羊王與張敷同傳初未標止足之目不知思廉所

稱宋書果何人作

良吏傳

庾華 父浚之宋應州刺史 按宋時無應州此必誤

也南史浚之宋義興太守 袁延壽曰當是雍字之譌

何遠 東海剡人也 剡當作郊

西北戎傳

河南 子休運等襲爵位 休運當作伏連

宕昌 天監四年王梁彌博來獻甘艸當歸 按武帝

紀天監元年安西將軍宕昌王梁彌領進號鎮西將軍此在彌博之前而傳不及之

武興 紹先歿子智慧立大同元年克復漢中智慧遣

使上表求率四千戶歸焉詔許焉即以為東益州

按武帝紀大同元年十二月以平西將軍秦南秦二州刺史武興王楊紹先進號車騎將軍平北將軍北益州刺史陰平王楊法浚進號驃騎將軍則大同初紹先尚存楊法浚當是楊定之後襲封者而傳不及之皆史之踳駁也

侯景傳

又有柔元鎮兵吐斤洛周 魏書北史俱作杜洛周當從此傳吐斤本代複姓聲譌為杜

攷異

梁書

越常之貢來臻 常卽裳字說文常下帛也或从衣

西求救于黑秦 秦當作泰

又曰吾昨夜夢吞土卿試爲思之不害曰昔重耳饋塊

卒反晉國陛下所夢將符是乎 此語已見簡文帝

紀

高祖常夜夢中原牧守皆以地來降舉朝稱慶寤甚悅

之旦見中書舍人朱异說所夢 此段問荅亦見朱

异傳而此較詳

梁書

陳書

廿二史攷異廿七

錢大昕學

目錄

列傳第四周鐵虎 唐人避諱改虎爲武此鐵虎之名

蓋後來校書者所改周文育傳作鐵武此思廉元文

高祖紀上

仍命高祖監宋隆郡所部安化二縣元不賓 按隋志

信安郡平興縣舊置宋隆郡領初寧建寧熙穆崇德

召興崇化南安等縣未見安化之名或云卽南安崇

化二縣各舉下一字猶稱山陰會稽爲稽陰也

陳書

使持節都督六郡諸軍事軍師將軍南江州刺史 此

南江州未審置於何所

余孝頃亦爲南江州刺史

時寧都人劉藹等 按杜僧明周文育諸傳作劉法尙

齊平秦王中流矢歿 此平秦王不著姓名高歸彥封

平秦王其時無恙

齊送貞陽侯淵明 唐人避廟諱改淵爲浚或但稱明

此紀與徐陵傳俱有淵明字亦校書者所改

公龍驤虎步 此虎字亦後人追改韓擒虎北史但作

韓擒而陳書後主紀陳慧紀高宗諸子後主諸子任

忠樊猛魯廣達諸傳俱稱擒虎皆後人追改

高祖紀下

永定元年長城縣公道譚 前卷作道談

二年正月北徐州刺史唱義之初首爲此職 唱當作

昌昌義之梁時爲北徐州刺史蓋嘗任左右驍騎者

校書者不知昌義之爲人姓名妄於昌旁加口又增

一初字淺陋可笑

四月江陰王夢 按梁敬帝之弒陳史但書夢南史易

夢爲殂而以陳志繫之又衡陽王昌傳天嘉元年三

月入境詔令主書舍人緣道迎接景子濟江於中流

船壞以溺夢南史則云濟江于中流殞之使以溺告

延壽直筆勝于思廉遠矣梁書高祖紀臨川王宏傳於洛口潰師之役皆諱而不書姚氏父子修史於易代之後何必諱飾乃尔

十二月割吳郡鹽官海鹽前京三縣置海寧郡屬揚州按隋志失載此事前京縣不見於宋齊志大約梁所置也隋志於常熟縣下云梁置信義郡平陳廢并所領海陽前京信義海虞興國南沙入焉似梁時前京屬信義郡與此絕異

以安成所部廣興六洞置安樂郡按隋志亦失載此事南齊志廣興縣屬安成郡隋志無此縣疑平陳後

所廢

以寧遠將軍北江州刺史熊曇朗為開府儀同三司按曇朗傳無除北江州刺史之文陳時北江州治南陵而曇朗據豐城新淦之地與南陵隔遠蓋遙以州名授之

世祖紀

天嘉元年三月分荊州之天門義陽南平郢州之武陵四郡置武州其刺史督沅州領武陵太守治武陵郡其都尉所部六縣為沅州別置通寧郡以刺史領太守治都尉城按梁末已有武州蓋中廢而更立也

據此文武州與沅州非一地而隋志云武陵郡梁置武州後改曰沅州似不戢矣通寧郡之名隋志亦未見

五月改桂陽之汝成縣爲盧陽郡分衡州之始興安遠二郡置東衡州 按以侯安都傳攷之當時東衡州

實領三郡始興安遠及盧陽也紀文尙未該備汝成

當作汝城

宋齊志及安都傳皆作城字

盧陽隋志作盧陽監本亦

是盧字又攷歐陽顛傳稱梁元帝承制以始興郡爲東衡州則東衡州實置於梁末不知何年省入衡州至是復置耳

棧樸載哥

哥古歌字汲古閣本作歌

二年四月分荊州之南平宜都羅河東四郡置南荊州鎮河東郡 河東郡治松滋縣南荊州之名隋志失書羅郡志亦未見也南平郡前年已改隸武州

十一月以武昌國川爲竟陵郡以安流民 此僞置之竟陵隋志亦失書

三年六月以會稽東陽臨海永嘉新安新寧晉安建安八郡置東揚州 按梁時已置東揚州陳武帝平張彪之後命文帝都督會稽十郡遂省東揚不置至是又復其舊也攷陳文帝於梁末建節稱都督十郡其

後徐度沈恪沈欽鎮會稽則云九郡九郡之名見于
徐度沈恪傳較此紀多信安一郡十郡則史未詳其
名

四年二月以平南將軍華皎為南湘州刺史 本傳但
云湘州刺史南字疑衍

六年七月臨川太守駱文牙 本傳及陳寶應傳但稱
駱牙

九月罷豫章郡 此事疑有誤宣帝子有豫章王叔英
可證豫章郡未嘗罷也

廢帝紀

光大二年正月罷吳州以鄱陽郡還屬江州 按陳時

有兩吳州廢帝所廢之吳州治鄱陽後主所置之吳
州治吳郡

宣帝紀 依高祖世祖之例當以高宗題目而諸本俱
題宣帝目錄亦然皆誤也

太建五年五月石梁城降 按上書徐勣克石梁城此
又云石梁城降複沓甚矣通鑑作瓦梁城蓋溫公所
見本不誤當據以改正隋志六合縣有後齊所置瓦

梁郡

北高唐郡城降 按隋志同安郡宿松縣梁置高唐郡

今本唐誤作塘又江都郡清流縣有廢樂鉅高塘二縣初不見北高唐郡之文

六月豫章內史程文季克涇州城 胡三省曰齊涇州治石梁是年四月徐暹已克石梁城

七月周炅克巴州城 隋志黃岡縣有後齊所置巴州 淮北絳城及穀陽士民竝誅其渠帥以城降 胡三省謂絳城蓋虹縣城又引彭城郡之穀陽縣證此穀陽其實皆非也此文承周炅克巴州城之下炅傳本云江北諸城淮絳二字蓋轉寫之誤耳穀陽亦當在江北與蘄黃相近

八月罷南齊昌郡 按隋志蘄春縣後齊置齊昌郡而無南齊昌之名此紀有南齊昌又有齊昌則當時實有二郡隋志遺其一耳

九月陽平城降 按是年四月已書陽平郡城降此又云陽平城降是有兩陽平矣攷隋志江都郡安宜縣梁置陽平郡又魏志楚州所領有陽平郡領陽平濮陽二縣或前所書者安宜之陽平後所書者鍾離之

陽平乎 東魏楚州治鍾離城

高唐太守沈善度 通鑑作善慶

左衛將軍樊毅克廣陵楚子城 按魏收志東豫州太

和十九年置治廣陵城樊毅所克者當指此非江都之廣陵也

十月以黃城爲司州治下爲安昌郡滄湍爲漢陽郡三城依梁爲義陽郡並屬司州按胡三省通鑑注引魏收志譙州下蔡郡有黃城縣以爲黃城在壽陽西又引水經注柴水東逕黃城西東北入於淮謂之淮口以證成其說以予攷之乃大謬也攷隋志黃陂縣後齊置南司州後周改曰黃州又有安昌郡則黃城卽黃陂城因後齊嘗置南司州故陳亦仍司州之名也隋志於黃陂縣下又云後齊置產州陳廢之此紀

所云滄湍者卽後齊之產州彼志但言廢州不言改置漢陽郡者史之闕漏也隋志木蘭縣下云梁置梁安郡又有永安義陽二郡卽此紀之義陽郡也周書杞國公亮傳大象初與韋孝寬等伐陳亮自安陸道攻拔黃城黃城與安陸相近則必爲黃陂城非淮口之黃城矣當時北征元有兩路吳明徹大軍由壽陽趨彭沛而周昺魯天念輩別取江北蘄黃之地紀傳所載本不相混胡氏乃以下蔡之黃城當之則安昌漢陽義陽皆風馬牛不相及矣

七年三月及南豫江郢所部在江北諸郡按南豫州

之歷陽臨江江州之齊昌新蔡高唐郢州之齊安西陽所謂江北諸郡也

改梁東徐州爲安州武州爲沅州 梁之東徐治宿豫此武州當治下邳郡非武陵之武州也隋志下邳縣梁置武州下邳郡魏改州曰東徐後周改曰邳州而不見沅州之名

移譙州鎮于新昌郡 隋志所謂南譙州卽今之滁州五月分北譙縣置北譙郡領陽平所屬北譙西譙二縣合州之南梁郡隸入譙州 北譙卽今全椒縣隋志廬江郡慎縣東魏置平梁郡陳曰梁郡卽此紀之南

梁郡也西譙縣則隋志無之

八年十一月分江州晉熙高唐新蔡三郡爲晉州 按晉熙郡梁末已置晉州後爲北齊所有改爲江州今仍復其舊也

十年八月改秦郡爲義州十月罷義州及琅邪彭城二郡立建興領建安同夏烏山江乘臨沂湖熟等六縣屬揚州 按義州之廢置及建興郡隋志皆缺而不書

十一年十二月南北兖晉三州及盱眙山陽陽平馬頭秦歷陽沛北譙南梁等九州 九州當作九郡

十二年八月周使持節上柱國鄖州總管蒙陽郡公司
馬消難以鄖隨溫應土順沔儂岳等九州 周時鄖
州置總管府隋志漏而不書并鄖州亦不知所杜胡
三省謂周置鄖州于沔陽亦以意度之耳州所領有
安陸城陽二郡城陽卽應城縣見隋本紀而消難之降陳授
以大都督總督安隨等九州八鎮諸軍事尋又改安
陸郡爲南司州疑周之鄖州總管府卽置於安陸矣
隨州卽晉宋之隨郡溫州卽隋京山縣應州卽隋應
山縣土州卽隋土山縣順州卽隋順義縣沔州隋志
未見疑卽沔陽郡儂當作濠濠州卽隋吉陽郡岳州

卽隋孝昌縣

十一月其丹陽吳興晉陵建興義興東海信義陳留江
陵等十郡 今數之止九郡

十三年四月分衡州始興郡爲東衡州衡州爲西衡州

按天嘉元年已分置東衡州中間未見併省非史
有脫漏則重出矣

十月改鄱陽郡爲吳州 按後主禎明元年割吳郡置

吳州不應同時有兩吳州蓋鄱陽復置吳州之後未
幾卽罷而史家失書也

後主紀

五就莫來五能不至 五能當作八能

杜僧明傳

城破斬二侯 按二侯謂交州刺史武陵侯蕭諮廣州

刺史新渝侯蕭映也 武帝紀作新喻 傳不書諮之爵則二侯

字無根 南史同

周文育傳

監州王勸以文育為長流令 按廣州無長流縣南史

文育傳無令字蓋衍文也都督府有長流參軍不言

參軍者省文後人妄加令字

高祖以侯瑱擁據温州 温州蓋江州之譌南史作江

州

侯安都傳

徐嗣徽等復入丹陽至湖熟高祖追安都還率馬步拒

之於高橋 今江寧府通濟門外二十里有高橋門

即古高橋也

而勃戾不悛 勃與悖同

侯瑱傳

都督江晉吳齊四州諸軍事江州刺史 晉州治晉熙

郡吳州治鄱陽郡惟齊州不見於隋志

歐陽頎傳

文選

陳書

十

改授都督廣交越成定明新高合羅愛建德宜黃利安
石雙十九州諸軍事 按以隋志證之廣州治南海
交州治龍編越州治合浦成州治封川定州治鬱林
明州治交谷新州治新興高州治高涼合州治海康
羅州治石龍愛州治九真建州治安遂德州治九德
黃州治安平利州治金寧安州治欽江惟宜石雙三
州無攷舊唐志梁分建州之雙頭洞立雙州

吳明徹傳

可都督豫合建光朔北徐六州諸軍事 是時豫州治
壽陽合州治合肥建州治包信即殷城光州治光城即光

山北徐蓋治臨沂惟朔州不見於隋志按魏收志南
朔州蕭衍置治齊坂城領梁新蔡邊城義陽新城黃
川六郡梁郡領新息縣而黃川郡據隋志乃光山縣
地則朔州蓋在光息之間矣

程靈洗傳

出爲高唐太原二郡太守 按梁陳之際僑立高唐郡
于宿松太原郡于彭澤故靈洗以郡守鎮南陵

程文季傳

尋乘金翅助父鎮郢城 金翅舟名
又督北徐仁州諸軍事北徐州刺史 按隋志琅邪郡

攷異

陳書

七

舊置北徐州而仁州無可攷今據魏收志仁州蕭衍
置治赤坎城領臨淮一郡郡領已吾義城二縣而已
吾爲州郡治則已吾卽赤坎城矣隋志彭城郡之穀
陽縣舊有已吾義城二縣後齊併以爲臨淮縣大業
初併入則已吾卽穀陽縣地又彭城郡之蘄縣後齊
置仁州大業中州廢穀陽與蘄當亦相去不遠也

黃法氈傳

太平元年割江州四郡置高州以法氈爲高州刺史鎮
于巴山 按世祖紀天嘉四年罷高州隸入江州與
此文相應而梁書敬帝紀隋書地理志並不載此事

史之漏也巴山郡梁置領大豐新安巴山新建興平
豐城西寧七縣餘三郡未詳胡三省以爲臨川安成
豫寧不審何據攷是時江州刺史侯瑱爲余孝頃所
逼棄州詣闕則析置高州所以分孝頃之勢也然前
此周迪據有臨川之地梁元帝授以高州刺史則高
州之名不始于此矣

淳于量傳

都督郢巴南司定四州諸軍事 此南司州卽隋之黃
陂縣宣帝紀所謂黃城也此定州卽魏收志所云南
定州治蒙籠城者隋改名麻城麻蒙聲相近

胡穎傳

以穎爲五原太守 五原郡未詳所在

徐敬成傳

尋復爲持節都督安元堂三州諸軍事安州刺史鎮宿

預 此安州卽梁之東徐州治宿預潼州治夏邱元

州蓋卽下邳郡隋志下邳梁置武州而陳書宣帝紀

太建七年改武州爲沅州其時荆部已有沅州以此

傳證之當爲元州矣隋志不載元州之名亦漏也

沈恪傳

光大二年遷使持節都督荆武祐三州諸軍事平西將

軍荊州刺史 按祐州之名不見于隋志宣帝紀太

建十二年淳于陵克祐州城未知卽此祐州否

都督廣衡東衡交越成定新合羅愛德宜黃利安石雙

等十八州諸軍事 按歐陽頎傳都督十九州此有

衡東衡而無明高建及南康嗣王方泰都督十九州

本傳云廣衡交越成定明新合羅德宜黃利安建石

崖數之實十八州蓋史有脫文後主末年除王勇總

督衡廣交桂武等二十四州諸軍事則史家不能悉

數之矣

徐世譜傳

除通直散騎常侍衡州刺史資鎮河東太守 鎮當作
領梁陳之間往往有以刺史資領郡守縣令者程靈
洗以譙州刺史資領新安太守徐世譜以衡州刺史
資領河東太守陳詳以青州刺史資領廣梁太守熊
曇朗以桂州刺史資領豐城縣令黃法甄以交州刺
史領新淦縣令錢道戢以東徐州刺史領錢塘餘杭
二縣令章昭達先除定州刺史而後爲長山縣令亦
是以刺史資領縣令也又有以刺史資監別州者陳
擬以雍州刺史資監南徐州華皎以新州刺史資監
江州是也

魯悉達傳

梁元帝授持節仁威將軍散騎常侍北江州刺史 此
北江州當置于晉熙郡及悉達濟江而歸高祖授以
北江州刺史則移治江南隋志所云南陵郡陳置北
江州是也

齊遣行臺慕容紹宗以衆三萬來攻鬱口諸鎮 按慕
容紹宗之歿杜齊未受禪以前安得此時尙存此史
家傳聞之誤南史亦承舊文而未據北史以正之

周敷傳

梁內史始興藩王蕭毅 按梁書及南史始興王憺薨

世子亮嗣無名殺者

周炅傳

授戎威將軍定州刺史帶西陽武昌二郡太守 梁置

定州於江北蒙籠城陳初畫江為界未得其地炅

蓋鎮武昌而遙帶州名耳

進授使持節西道都督安蘄江衡司定六州諸軍事安

州刺史 此安州當是安陸郡蘄州即蘄春又為齊

昌郡江州即永安郡 隋志謂之北江州 衡州即齊安郡司州

即黃陂 隋志謂之南司州 其時皆未入版圖方議北伐遙假

六州之名耳

以衆二萬出自巴蘄 隋志黃岡縣有後齊所置巴州

即此傳之巴州非巴陵之巴州也

衡陽王昌傳

尋與高祖俱往荊州 高祖當作高宗

又與高祖俱遷闕右 高祖當作高宗

南康愍王曇朗傳

上曰不承則上刑 上刑南史作上測按隋書刑法志

載陳時律令其有贓驗顯然而不款則上測立立測

者以土為堞高一尺上圓劣容囚兩足立鞭二十笞

三十訖著兩械及杻上堞一上測七刻日再上

攷異

蔡景歷傳

衡陽獻王時為吳興郡昌年尚少 當移昌字於衡陽

獻王之下

禎明元年配享高祖廟庭 本紀不載此事疑所配享

乃高宗也

王通傳

父琳司徒左長史 此別一王琳

劉仲威傳

隨莊入齊終于鄴中 按仲威仕於蕭莊莊敗隨入北

齊義不臣陳當附梁史劉之遴傳不應入陳書

沈炯傳

字禮明 南史作初明

馬樞傳

梁邵陵王綸為南徐州刺史素聞其名引為學士 按

梁時東宮有學士據此傳則王府亦有學士也又梁

有壽光殿學士士林館學士西省義學士陳有嘉德

殿學士

姚察沈不害陸琰

宣明殿學士

姚察陸琰

天保殿學士

陸玠

德教殿學士

蔡翼陸從典阮卓

撰史學士

顧野王

五禮學士

沈德威

而東宮亦有學士有義省學士

華皎傳

尋詔督尋陽太原高唐南北新蔡五郡諸軍事尋陽太守
守 此南北新蔡郡當在江北黃梅縣而隋志無其
文黃梅縣本名永興隋開皇初改曰新蔡蓋因舊郡
名以名縣耳

蕭乾傳

陳寶應在建晉 建晉謂建安晉安也褚玠傳稽陰大
邑久無良宰謂會稽山陰也

謝嘏傳

陳郡夏陽人也 夏陽當作陽夏

蕭引傳

靖卽悟旨盡遣兄弟下都爲質 按蕭引奉使廣州在
太建末及後主至德初仍命陳方慶以兵襲靖誅之
陳氏武功之不振蓋由于此

陸子隆傳

東昌縣人修行師 按隋志廬陵郡有東昌縣

周宏正傳

出爲鄴令 梁之鄴縣未審所在 袁廷檣曰鄴
疑是鄴字

世祖九王傳

二男早卒本書無名 思廉所稱本書當卽其父察撰
述之本

初高祖兄始興昭烈王道談梁紹泰二年追贈侍中使持節都督南兖州諸軍事南兖州刺史封義興郡公按高祖紀梁太平二年詔贈高祖兄道談散騎常侍使持節平北將軍南兖州刺史長城縣公與此互異敬帝以紹泰二年改元太平始進封陳霸先義興郡公則道談贈官必在太平以後且紀于永定元年書追贈皇兄長城縣公道談太尉封始興郡王似無追封義興郡公之事又高祖紀稱梁太平二年贈弟休先本或作休光南徐州刺史武康縣侯而南康王曇朗傳稱休先追封武康縣公疑亦傳誤

高宗二十九王傳

晉熙王叔文 荊州刺史陳紀 卽陳慧紀也史脫一字

蕭摩訶傳

封廉平縣伯 按隋志廉平縣屬清遠郡

任忠傳

改封梁信都郡公 南史無都字攷隋志梁有梁信郡領梁信縣隋爲封川縣

孝行傳

謝貞 孤子釁禍所集 按貞以母憂去職父已先亡

而自稱孤子可證温公書儀母亡稱哀子唐以後始有之

儒林傳

沈不害 尋兼文林著士 按陳時學士之外又有著士張正見阮卓皆為撰史著士據此傳則文林館亦有著士矣

王元規 姻不失親古人所重 此以因作婚姻解與

論語孔安國義異

文學傳

何之元 驃騎王琳崇立後嗣雖不達天命狀是其忠

節今以如干卷為後嗣主 按何之元梁典自敬帝

禪陳即繼以會稽王莊稱為後嗣主其直筆非思廉

所及

元皇壽

在庚子

是歲魏文帝

元皇壽

黃

始

始於衍子于始於立

按魏書

魏

魏書文帝通齊書

齊

齊書文帝通齊書

齊書文帝通齊書

備林傳

沈不

右

元規

魏書一

魏書一 廿二史攷異廿八
會蘇王蘇祿為匈奴主其直筆非思廉
謂今以甲干魯為匈奴主 姓河文元梁與自始帝

魏書一

廿二史攷異廿八

錢大昕學

序紀

神元皇帝元年歲在庚子 是歲魏文帝受漢禪改元

黃初

昭成皇帝 司馬聰歿衍子干齡僭立 按魏收史於

慕容元真石大雅苻永道馮文通皆稱字避魏諱也

晉哀帝名丕無所回避何以亦稱字

太祖紀

登國三年渡弱落水 弱落即饒樂聲之轉

文具

魏書一

世祖紀下

太平真君三年征南將軍東安公刁雍東趨廣陵 此非揚州之廣陵在今光州息縣魏時嘗置東豫州于此

高祖紀上

延興元年劉彧將垣崇祖率眾二萬自郁洲寇東兖州 此東兖州治瑕邱即劉宋之兖州魏泰常中已置兖州于滑臺故此加東字游明根傳由都督兖州諸軍事瑕邱鎮將就拜東兖州刺史是也 二年以萬安國為大司馬大將軍封安城王 安城當

作安成

安國傳亦誤作安城

太和元年廣川公皮懼喜 本傳作皮喜

高祖紀下

十六年詔祀唐堯于平陽虞舜于廣甯夏禹于安邑周

文于洛陽

周文當為周公之謠 北史亦誤

十八年可詔荆郢東荆三州勒勅蠻民 是時荊州治

魯陽郢州治南安

今葉縣

東荊州之名不見於地形志

據蠻傳延興中大陽蠻酋桓誕擁沔水以北澠葉以南入萬餘落遣使內屬高祖拜誕征南將軍東荊州刺史治於朗陵太和十年移居潁陽而隋志云淮安

郡後魏置東荊州其地卽隋之比陽縣未審孰是房
亮楊大眼薛真度酈道元寇治元顯恭陸恭之杜頤
張熠裴佗俱嘗爲東荊州刺史

二十年廣州刺史薛法護南叛 按地形志廣州永安

中置治魯陽據此紀則廣州之名先已有之但其時

魯陽爲荊州治所未知廣州治何城也

太宗時公孫表爲廣州刺

史

世宗紀

太和二十三年南徐州刺史沈陵南叛 按是時沈陵

據宿豫以叛則南徐州治宿豫也而地形志謂宿豫

郡高祖初立東徐州似誤太和之世東徐治團城不

應更置于宿豫也

肅宗紀

熙平二年城青徐兗涇平營肆七州所治東陽歷城瑕

邱平涼肥如和龍九原七城 按諸州治所地形志

具載之惟涇州志云治臨涇城而紀作平涼未詳

正光二年南荊州刺史桓叔興自安昌南叛 按南荊

州不載於地形志安昌蓋其治所也隋志春陵郡後

魏置南荊州西魏改爲昌州卽此

孝昌三年東秦州刺史潘義淵以汧城降 按地形志

北華州太和十五年置東秦州後改治杏城則東秦
卽北華也而此紀下文卽有賊帥胡引祖據北華州
以應之之語似別有一東秦州

出帝紀

永熙元年夏州徙民郭遷據宥州反 宥非州名通鑑
作青州當從之

以待中驃騎大將軍封陰之任祥竝爲儀同三司 陰
之當是隆之之謬

二年都督河渭部三州諸軍事驃騎大將軍世襲河州
刺史梁景獻 按部非州名恐是鄯字之謬

孝靜紀

天平元年以魏郡林慮廣平陽邱汲郡黎陽東濮陽清
河廣宗等郡爲皇畿 按地形志無陽邱郡當是陽
平頓邱二郡各脫一字耳志亦無東濮陽東下當脫
郡字志尚有北廣平一郡紀亦脫之

元象元年豫州刺史堯雄攻揚州拔之 揚當作陽地
形志陽州領宜陽金門二郡

興和二年西魏行臺宮廷和陝州刺史宮元慶率戶內
屬置之河北 按地形志汲郡汲縣有陳城興和二
年恒農人率戶歸國仍置義州于城中卽此事也汲

郡在河北恒農卽陝州天平末陝州入西魏興和中
乃立義州置恒農新安澠池宜陽金門諸郡以撫其
流民也魏收孝靜紀已亡後人據它書補之其於西
魏事例書寶炬獨此書西魏蓋沿舊文而未及改更
耳

四年封祖裔為尙書右僕射祖裔卽隆之也此獨書
其字

武定七年相譚侯蕭退來降相譚當作湘潭

皇后傳

景穆恭皇后郁久閭氏河東王毗妹也外戚傳閭毗

本蠕蠕人蠕蠕姓郁久閭氏後改稱閭氏此傳猶仍
舊稱蓋非魏收本文也高宗紀但云母閭氏

昭成子孫傳

常山王素於涿鹿之陽立平原郡以處之此事地

形志不載

可悉陵沮渠茂虔令一驍將茂虔卽牧犍譯音無

定字但魏收史皆用牧犍字此作茂虔蓋後人以它

書補綴未及檢改

陳留王崇子建建子瑛位恒朔二州刺史按魏宗

室多同名者陳留王崇之孫名瑛而隴西公崙之子

亦名瑛文成之孫又有河間王瑛任城王澄之孫名
朗而章武王彬之孫亦名朗即後廢帝南安王楨之孫長
廣王名从日从華而咸陽王禧之孫亦與同名昭成
之孫有毗陵王順而任城王澄之子亦名順道武之
子有陽平王熙而中山王英之子亦名熙道武之子
有河間王脩而廣平王懷之子亦名脩即出帝武昌王
鑒之子名亮而江陽王繼之孫亦名亮烈帝之後有
東陽王丕而明元之子又有樂平王丕明元之子有
建寧王崇而昭成之後亦有陳留王崇昭成子有秦
王翰而太武子又有東平王翰亦嘗封秦王南安王
楨之孫有章武王融而陽平王新成之孫亦名融河
南王曜之曾孫有武昌王鑒而安樂王長樂之孫亦
名鑒文成子有廣川王略而中山王英之子亦名略
獻文子有趙郡王幹而昭成之後亦有新蔡公幹高
陽王雍之孫有濟北王徽而城陽王長壽之孫亦名
徽秦王翰之孫有中山王纂而南平王渾之孫亦名
纂中山王略之弟又名纂河南王曜之子有武昌王
提而臨淮王譚之子亦名提烈帝之後又有樂城侯
提廣陽王淵之子名湛而章武王融之弟亦名湛明
元之子有新興王俊而章武王彬之孫亦名俊道武

之子有清河王紹而常山王遵之曾孫亦名紹常山
王遵之孫有城陽公忠而樂浪王萬壽之曾孫亦名
忠臨淮王提之子名昌而咸陽王禧之子亦名昌太
武之子有臨淮王譚而趙郡王幹之子亦名譚淮南
王他之孫名顯而武昌王平原之孫亦名顯淮南王
他之曾孫名均而汝陰王天賜之孫亦名均衛王儀
之子有南陽王良而樂安王範之子亦名良陽平王
新成之子名欽而彭城王勰之孫亦名欽至若景穆
之子陽平濟陰二王俱名新成因稱濟陰爲小新成
以別之此其尤異者也廣陽王濙本名淵後人避唐
諱追改非與趙王濙同名

道武七王傳

禹 東海太守帶峒晤戌主 峒當作峒本司吾後人
加山旁

伯和 諡曰哀王 此下脫一葉

景穆十二王傳中

任城王澄 澄奏宜以東中帶滎陽郡南中帶魯陽郡
西中帶恒農郡北中帶河內郡 此奏在肅宗朝既
未見納然元萇於世宗時已爲北中郎將帶河內太

守矣

陸清都以南中郎將帶魯陽太守未詳何
時楊肅宗時除北中郎將帶河內太守

天網恢恢疏而不漏 今本老子皆作不失惟景龍石
刻本作不漏

東阿公順 廣陽王淵姦徽妻子氏 此傳及肅宗紀
李崇崔光辛纂賀拔勝儒林文苑傳俱云廣陽王淵
而太武五王傳作淡蓋魏史太武五王傳已亾後人
取北史補之北史避唐諱改淵爲淡而校書者不知
追改也

景穆十二王傳下

中山王英 行中軍大將軍臨川王蕭宏 按魏史於
諸帝之諱皆回易本字如崔宏稱元伯慕容恪稱元

恭是也而紀傳于蕭宏之名多不回避必非魏收元
文當從島夷傳作蕭密爲是餘皆後人據南史追改
貴乎 除平北將軍南相州刺史 按地形志不載南
相州之名

獻文六王傳上

咸陽王禧 高祖以諸弟典三都 三都謂中都內都
外都也三都大官皆典獄訟者

孝文五王傳

清河王懌 囚懌於門下省誣懌罪狀 據此文知胡
后傳所書逼幸懌事出於元義誣陷不足信也此卷

文多殘闕如懌子亶襲王爵孝武西奔亶承制行事
皆常見于本傳又廣平王懷傳全篇俱闕汝南王悅
傳亦有脫文卷末又無史臣論讚

崔元伯傳

加周兵將軍

按魏初將軍之號有晉兵

奚斤樓伏連薛提奚斤又

為大吳兵

公孫表

楚兵

叔孫建王慧龍

鄭兵

奚斤

秦兵

賀狄宋

周魯兵

安衛兵

陳兵

尉眷張蒲

周兵

崔元伯

勝兵

張濟義

禮又正直將軍

叔孫建功勞將軍元屈直意將軍

王洛兒忠意將軍車路頭黑稍將軍于栗磾皆前代

所未有也

顯祖以為安南將軍南冀州刺史

按劉宋冀州治歷

城魏因崔道固故官授之信都有冀州故加南字

尉古真傳

出為平西將軍東涼州刺史

按地形志無東涼州

古弼傳

賜名曰弼取其直而有用後改名弼言其輔佐材也

北人讀弼如筆譯音無定字非必別有取義

陸真傳

都督沃野武川懷朔三鎮諸軍事安北將軍懷朔鎮大

將 按江陽王繼高祖時由撫冥鎮都大將轉都督

柔元撫冥懷荒三鎮諸軍事柔元鎮大將陸延於正
始初由武川鎮將除都督沃野武川懷朔三鎮諸軍
事懷朔鎮大將宇文福亦爲都督懷朔沃野武川三
鎮諸軍事懷朔鎮將是六鎮之中又以柔元懷朔爲
要鎮也其後置朔州於懷朔鎮慕容契爲都督朔州
沃野懷朔武川三鎮三道諸軍事朔州刺史楊椿爲
都督朔州撫冥武川懷朔三鎮三道諸軍事朔州刺
史

于栗磾傳

都督兗桓二州諸軍事鎮南將軍枋頭都將 桓當作

相

高湖傳

漢太傅哀之後 按唐書宰相世系表後漢渤海太守
高洪居渤海菑縣四世孫褒字宣仁太子太傅此卽
湖之祖也此太傅上當有太子二字漢時太傅爲上
公除授者甚少安得有高哀其人乎哀亦褒之俗體
字易哀多益寡唐石經作褒

都督壽徐齊濟兗五州諸軍事 壽當作青地形志無

壽州

崔浩傳

攷異

今茲害氣在揚州不宜先舉兵 是歲歲在庚午午害
丑丑爲星紀吳越之分

又雪之消液纔不斂塵 纔不通鑑作僅能

李順傳

平東將軍西兖州刺史 此西兖州治滑臺非地形志
之西兖州也志之西兖治定陶乃孝昌中所置

仍除北雍州刺史 按地形志無北雍州

正光二年南荊州刺史桓叔興驅掠城民叛入蕭衍衍
資以兵糧令築谷陂城以立洛州逼土山戍 梁置
洛州於南荊境內尋爲魏人所陷故隋志不載

司馬楚之傳

奚斤旣平河南以楚之所率戶民分置汝南南陽南頓
新蔡四郡以益豫州 是時豫州治虎牢楚之屯據
汝潁閒距南陽尙遠蓋僑置也

殺姚縱夫子壽春 通鑑作聳夫

開府儀同三司雲中鎮大將朔州刺史 魏初置朔州
於雲中楚之及子金龍寶龍相繼爲刺史

刁雍傳

延和二年立徐州於外黃城置譙梁彭沛四郡九縣
按地形志陽夏郡濟陽縣有外黃城延和二年置徐

攷異

魏書一

七

州皇興初罷蓋徐州治外黃者三十餘年至皇興初
薛安都以彭城入魏乃移州治彭城也

臣鎮去沃野八百里 刁雍時為薄骨律鎮將表稱臣

鎮去沃野八百里則沃野與薄骨律非一地而通鑑

注引宋白云太和十年改薄骨律鎮為沃野鎮不知

何據 慕容契正始初除都督沃野薄骨律二鎮諸軍事沃野鎮將

遵少不拘小節 自此以下複述遵事遙接上文遵字

奉國襲爵句而開以遵弟獻獻弟融融弟肅云云太

史公列傳敘事往往如此刊本以融弟肅提行而遵

少不拘小節云云即承其下汲古閣本遂疑遵字乃

肅字之誤大不然矣楷尙整皆遵之子非肅子也

蕭衍新化太守杜性新化令杜龍振平陽令杜臺定等

率戶三千據地內附 按刁遵時為洛州刺史治上

洛則此新化郡當距上洛不遠攷地形志南郢州宕

都郡有西新化東平陽二縣疑即梁之新化郡也

薛辯傳

長子初古拔一曰車轂拔 初與車古與轂聲相近汲

古閣本轂作輅誤

除冠軍將軍南豫州刺史 南豫州治懸瓠即地形志

之豫州也

與南兖州刺史游明根 明根傳作東兖此誤也正光
中始置南兖州于譙城延興時尙無南兖之名

自徙都洛邑鳳子兄弟移屬華州河西郡焉 按地形

志華州無河西郡 贈都督冀定太三州諸軍事車騎將軍冀州刺史 太

州蓋天平中所置而地形志無之 監本太

和因表立東夏州世宗從之 據地形志東夏州延昌

二年置

寇讚傳

拜讚安遠將軍南雍州刺史治于洛陽立雍州之郡縣

以撫之 按南雍州之置地形志亦闕而不書

遷建威將軍郢州刺史及高祖南遷郢州地爲王畿除

宏農太守 按高祖遷洛之後於洛京置司州罷懷

陝郢北豫東雍諸州屬焉仿古王畿千里之制也魏

史避顯祖諱皆稱恒農此獨不回避蓋後人妄改 楊播

傳亦有作

宏農者

劉休賓傳

稍遷幽州刺史鎮梁鄒 此劉宋僑立之幽州無實土

宋志亦不載

房法壽傳

魏書一

加法壽綏邊將軍魏郡太守 此魏郡僑置于齊地地
形志所謂東魏郡治歷城後徙臺城者也

以兼侍中房靈賓督清河廣川郡事成盤陽 地形志
東清河郡治盤陽城故房士隆亦以東清河太守帶
盤陽鎮將崔勔以清河太守帶繫陽鎮將繫與盤同
以功賜爵壯武侯加平遠將軍 按上文法壽已授平

遠將軍矣不應更加平遠之號前後當有一誤攷房
彥謙碑述其先世云法壽以魏郡太守立功歸魏封

莊武侯

壯莊二文
古相通

使持節龍驤將軍東冀州刺史然

則後所加者蓋龍驤將軍也平遠將軍第四品龍驤

將軍第三品故云加

韋闐傳

又有武功蘇湛

按韋闐傳未附見武功蘇湛天水姜

儉二人刊本誤以蘇湛提行而又有武功四字贅於

前文之下不可通矣

裴駿傳

出爲平南將軍郢州刺史詢以凡司戍土蠻酋田朴特

地居險要衆踰數萬足爲邊捍遂表朴特爲西郢州

刺史 按西郢州之置不載於地形志據此傳蓋在

肅宗時也隋志比陽縣又有比陽故縣置西郢州西

魏改為鴻州即此

辛紹先傳

孝昌初釋褐南司州龍驤府錄事參軍按地形志南
司州魏正始元年為郢州孝昌三年陷蕭衍改為司
州武定七年復乃有南司之名辛子馥仕孝昌初其
時無南司州也

後除給事中南冀州防城都督此南冀州治聊城地
形志平原郡武泰初立南冀州永安中罷州路思令
傳割冀州之清河相州之陽平齊州之平原以為南
冀州

持節為南濟冀濟青四州慰勞使南濟州未詳所在

許彥傳

武定末東陽平太守東陽平郡屬兗州

西高陽太守按地形志瀛州青州皆有高陽郡以地

望準之瀛州之高陽在西

李訢傳

父崇此又一李崇

以崇為平西將軍北幽州刺史北幽州未詳所在

高允傳

京兆韋閔友規閔傳作友觀

允秋月巡境問民疾苦至邵縣 邵縣卽邵上郡此時
罷爲縣屬河內郡允爲懷州刺史正其屬縣也

允與從叔濟族兄毗及同郡李金俱被徵 按篇末並

舉三人名乃但敘濟毗而不及金何也若云金事別

見李叔虎傳則此文又爲繇復矣濟字叔民毗字子

翼已見前徵士頌而又書之是不可省平 徵士頌
金作欽

崔鑒傳

孝昌末冀州流民聚于河外因立東冀州除秉爲刺史

東冀州未詳所在

尉元傳

散騎侍郎張引領卒二千守茱萸 按地形志彭城郡

呂縣有茱萸山

元表淮陽郡上黨令韓念祖 按尉元在徐州表稱南

濟陰郡睢陵縣人趙憐等乞念祖爲令詔聽如請然

地形志無上黨睢陵二縣并未見南濟陰郡名攷沈

約州郡志淮陽郡有上黨縣本流寓郡併省來配濟

陰郡有睢陵縣皆屬徐州徐州又有北濟陰郡故稱

南也魏初得徐兗諸州其郡縣大率因宋舊後來郡

縣有併省又多析置之州名目紛然攷證益難矣 茹皓

寓居淮陽上黨

攷異

魏書一

七

以山陽在畿內改爲博陵郡開國公 按孝文遷洛之後畿內郡國不以分封故河南王幹徙封趙郡潁川王雍徙封高陽平陽公丕徙封新興山陽公尉詡改封博陵滎陽侯李沖改封陽平河東侯薛達改封華陰

韓茂傳

先是河外未賓民多去就故權立東青州爲招懷之本新附之民感受優復然舊人奸逃者多往投焉均表陳非便朝議罷之 東青州未詳所在顯祖初游明根爲東青州刺史

劉昞傳

除其一子爲郢州雲陽令 按地形志雲陽縣屬廣州定陵郡太和中郢州治南安其時未有廣州也

李孝伯傳

遷之於兗豫之南置淮陽郡以撫之 是時魏未得淮北之地兗州治滑臺豫州治虎牢此淮陽郡亦僞置非東楚州之淮陽也

崔挺傳

又除都督三荆諸軍事 三荆謂荊州東荆南荆也荊州亦稱西荆辛纂行西荊州事

武泰初改郡爲唐州 按地形志晉州孝昌中置唐州

建義元年改武泰之元年卽孝昌四年也其年卽改

建義則平陽之爲唐州不及一年樊子鵠傳尔朱榮向洛假節都督河

東正平軍事行唐州刺史建義初拜晉州刺史

以本將軍出除管州刺史 管當作營

楊播傳

建義初除冠軍將軍東雍州刺史其年州罷 據此傳

東雍州於建義初始罷而地形志云東雍州太和中

罷未詳誰是

出除都督雍南豳二州諸軍事本將軍雍州刺史 按

地形志無南豳州

永熙中以本將軍除北雍州刺史 按地形志無北雍

州

薛安都傳

永平初分梁州晉壽爲益州 按地形志益州正始中

置永平元年卽正始五年也

田益宗傳

都督光城弋陽汝南新蔡宋安五郡諸軍事 按地形

志東豫州領汝南東新蔡弋陽長陵陽安六郡

與此互異志所據者武定之郡縣傳所書者太和之

郡縣也

興祖太和末亦來歸附景明中假郢州刺史及義陽置

郢州改授征虜將軍江州刺史治麻城興祖卒益宗

請隨興代之世宗不許罷并東豫 隋時立麻城縣

蓋因此名地形志有北江州未審卽其地否

王肅傳

除都督豫關東郢三州諸軍事本將軍豫州刺史 按

太和十八年置東郢州于汝陰治社亭城

加都督豫南兖東荆東豫四州諸軍事此南兖州治

渦陽非地形志之南兖治譙城者也

志之南兖州正光中置

邢巒傳

河間鄭人也 鄭當作鄭

蕭淵藻是羣劇少年 北史作裊展少年此云羣劇疑

後人妄改

李平傳

頓邱人也彭城王疑之長子 按皇后外戚二傳俱云

梁國蒙縣人而此傳及李崇傳俱云頓邱人此里居

之互異也疑封彭城王外戚傳亦失之

李崇傳

許昌縣令兼紆麻戍主陳平玉南引衍軍 按地形志

揚州潁川郡之許昌縣有硤石山卽此傳之許昌非曹魏建都之許昌也

崔亮傳

高祖聞之嘉其清貧詔帶野王令魏世京職俸薄亮雖任中書侍郎尚書左丞而幹祿猶不如縣令之饒裕故令其帶野王令同時北中府長史裴聿亦帶溫令

崔休傳

青州九郡民按地形志青州領齊北海樂安渤海高陽河間樂陵七郡

裴延儁傳

孝莊初為廣州防蠻都將行廣漢郡事廣漢當作漢廣

袁翻傳

皇興中東陽州平隨文秀入國按青州治東陽城東陽非州郡之名當云青州平或云東陽平詞意乃通

劉藻傳

在任八年遷離城鎮將太和中改鎮為岐州按地形志岐州太和十一年置治雍城鎮則岐州本雍城鎮也據此傳藻為雍城鎮將在任八年乃遷離城鎮將

則離城與雍城非一地岐州乃離城鎮所改與志自相矛盾

傅暨眼傳

南徙渡河家於磐陽 磐陽卽盤陽漢之般陽縣也東

清河郡治此

拜靈越鎮遠將軍青州刺史貝邱子鎮羊蘭城 按地

形志滄州樂陵郡之厭次縣有羊闡城韓均傳謂河

外未賓權立東青州者疑卽此皇興初慕容白曜定

青州因於此加東字

蕭衍遣其信武將軍衡州刺史張齊 按南史齊爲南

梁州刺史

都督梁西益巴三州諸軍事 按地形志無西益州

李神傳

累遷威遠將軍新蔡太守領建安戍主 按地形志豫

州東豫州潁州霍州南定州蔡州揚州南朔州南建

州皆有新蔡郡梁書夏侯詳傳建安戍爲魏所圍以

詳爲建安戍主帶邊城新蔡二郡其後席法友爲安

豐新蔡二郡太守建安戍主法友去而胡景略代之

其時建安戍尙屬齊景明元年魏始得壽陽移兵攻

建安景略請降自是建安始屬魏而李神亦以新蔡

太守領建安戍主是新蔡郡常治建安矣此新蔡疑是揚州之新蔡據地形志所領有新蔡固始二縣一統志云新蔡廢郡在固始縣東者也

轉寧遠將軍陳留太守領狄邱戍主 此陳留疑亦揚

州之陳留

夏侯道遷傳

衍以王鎮國為刺史 鎮當作珍

楊大眼傳

以功封安成縣開國子 按楊大眼造像記石刻作安戎縣安戎屬略陽郡與仇池為近此作成傳寫之謬

也北史作安城亦誤

尔朱榮傳

太祖初以南秀容川原沃衍欲令居之 南秀容蓋肆州之秀容

都督并肆汾廣恒雲六州諸軍事 按廣州治魯陽非

榮所得督當是燕字之謬

則彭韋伊霍夫何足數 彭韋謂大彭豕韋也監本草

作韓誤

尔朱仲遠傳

兼尚書左僕射三徐州大行臺 三徐者徐州及北徐

東徐也

尔朱度律傳

復除軍州刺史 軍字誤

張普惠傳

衍又遣定州刺史田超秀田僧達等竊陷石頭戍徑據

安陂城 按地形志南朔州之邊城郡治石頭城即

石頭戍也

樊子鵠傳

乃分兵擊衍苞州然州宕州大澗蒙縣等五城 此梁

所置諸城當去譙城不遠

賀拔勝傳

都督三荆二郢南襄南雍七州諸軍事 按地形志無

南雍州

勝兄可泥 即賀拔允也

尋詔岳都督涇北豳二夏四州諸軍事 按地形志無

北豳州

加岳都督三雍三秦二岐二華諸軍事雍州刺史 後

魏置北雍州於華原東雍州於鄭縣 據隋志 併雍州為

三雍也三秦之名未詳據地形志但有秦與南秦太

和中嘗置東秦即北華也

詔岳都督雍華北華東雍二岐函四梁二益巴二夏蔚
寧南益涇二十州諸軍事四梁謂梁及東梁南梁
北梁也周書魏廢帝三年改東梁爲金州南梁爲隆
州北梁爲靜州今地形志無北梁史之闕也寧與南
益二州地形志亦失書

常景傳仍詔景爲幽安元等四州行臺幽安元止三州而云
四州恐有誤地形志亦無元州

外戚傳上邱公雅嶷誕等皆封公位顯後進峻爵爲王按魏
李峻峻與五弟誕嶷雅白永等前後歸京師峻封頓

邱公雅嶷誕等皆封公位顯後進峻爵爲王按魏
收史外戚傳上卷已亡後人以它書補綴故嶷等封
號及事迹皆不詳攷顯祖紀和平六年封繁陽侯李
嶷爲丹陽王皇興元年進馮翊公李白爵梁郡王而
李平傳云彭城王嶷之長子則嶷初封丹陽王又改
封彭城也李崇傳云襲爵陳留公崇爲誕之子則陳
留必誕之封號也高祖紀太和四年頓邱王李鍾葵
有罪賜死此峻之後襲爵者而傳亦不載

良吏傳

杜纂又詣赭陽武陰二郡課種公田武陰疑是舞

陰之譌地形志無此二郡蓋後來省併

術藝傳

劉靈助 破西胡于韓陵山 西當作四四胡謂尔朱

天光尔朱兆尔朱度律尔朱仲遠也

劉裕傳

遣其黨俞伯奇出頓大電 大電疑大雷之譌

蕭道成傳

圍寶卷輔國將軍北新安豐二郡太守胡景略于建安

城 北新下脫蔡字

蕭衍傳

衍將蕭昶寇淮陽 梁書有吳平侯景即此蕭昶也唐

人避諱追改

荊州刺史桓叔興 當作南荊州脫南字

益州刺史蕭潤猷 潤當作淵

黑獺亡山之走 亡當作芒

氏傳

後稱藩於晉永和十年改初為天水公 此篇以東晉

永和太和咸安紀年後乃用登國之號又稱晉國號

不斥晉帝姓名蓋非魏收史之舊後人取北史補入

匈奴宇文莫槐傳

子邱不勤立尙平文女 按序紀邱不勤妻平帝綽女

非平文帝鬱律女此傳誤北史亦與此同

自序

成帝世終鉅鹿太守 此成帝謂漢成帝也魏歆仕于

漢成帝朝而其子悅乃仕于元魏太武之世此理之

所必無者伯起亦通人何至憤憤乃尔良由魏史自

序久亡後人節取北史補之而北史又有脫簡後人

無從校正爾

於是與通直常侍房延祐司空司馬辛元植國子博士

刁柔裴昂之尙書郎高孝幹 按魏收上十志啟啟

未列名者有辛元植刁柔高孝幹而無房延祐裴昂

之又多前西河太守綦母懷文一人

前後二表一啟焉 按史例序論表啟皆出收一人之

手此二表一啟下當有獨出于收四字

宋

魏書二

廿二史攷異廿九

錢大昕學

天象志三

皇始二年六月庚戌月掩金于端門外 此即前卷所
 書月掩太白事占驗亦略同蓋魏收志第三第四卷
 闕失後人以張太素書補之太素天文志祇有兩卷
 凡月與五星變異但依年代順敘不復區別與魏收
 志體例各殊故此卷月掩犯多與前兩卷重出
 由是魏為北帝而晉氏為南帝 按太素唐人故於南
 北朝無偏黨之詞其書蕭衍起兵襄陽推南康王寶

融爲帝則稱東昏爲東主和帝爲西君其書東西魏事則云由是分爲二國又云東西帝割據山河又云梁魏三帝皆大赦改元非若魏收之黨於鄴都魏澹之黨於關西也

明年齊將陳達伐我南鄙陷澧陽澧陽本紀作醴陽陳達卽陳顯達也當是唐人避諱去顯字

天象志四

是時勃海王歡起兵信都魏收史稱高歡爲齊獻武王此志前書渤海王歡後書大丞相歡

地形志上

今錄武定之世以爲志焉按伯起志州郡不述太和全盛之規轉錄武定分裂之制至秦雍以西不在東魏疆域之內乃據永熙縮籍以足之未免自亂其例矣

魏尹貴鄉天平二年分館陶置治趙城有東中郎將治按孝靜帝紀天平元年初置四中郎將於礪石橋置東中蓋卽貴鄉縣地

東郡秦置治滑臺城按志載州郡所治皆舉城名而不言其縣故攷證爲難今略言其可知者滑臺城卽東郡之白馬縣也晉州治白馬城則平陽之禽昌縣

也 太平寰宇記後魏擒赫連
昌於白馬城置禽昌縣

濮陽郡 城陽二漢晉屬濟陰 城當作成

常山郡 孝章建初中爲淮陽永元二年復 按後漢

無改常山爲淮陽之事此魏收之誤卷末攷證一條

已詳言之蓋宋館閣諸臣劉攽范祖禹輩所駁正也

鉅鹿郡 橐城有肥壘 按漢志真定有鹿壘縣晉以

後蓋省入橐城當云有肥壘城後人轉寫作壘又脫

城字誤以爲壘壁之壘矣

鄴二漢晉屬有鄴城 鄴不成字當作鄴說文鄴鉅鹿

縣从邑臬聲漢志作鄴與臬文異而音義同

渤海郡 脩前漢晉屬號脩後改 脩與漢晉無異文

何以云改據列傳高氏封氏皆稱渤海裔人乃知晉

以前本作脩後魏改從艸耳上脩字當作菑

武邑郡 灌津前漢屬信都 漢書灌作觀

北五城郡 五城之五隋志皆作伍五城定陽本汾州

屬郡孝昌中寄治西河并移西河郡於平陽界興和

中又析置北五城定陽郡皆在隋之臨汾縣地

汾州延和二年爲鎮太和十二年置州治蒲子城 按

穆羆傳高祖時爲吐京鎮將後改吐京鎮爲州仍以

羆爲刺史然則魏初本爲吐京鎮蒲子城卽吐京鎮

也汾州之治西河自裴良始

吐京郡真君九年置 按水經注吐京郡治卽土軍縣之故城也漢西河郡有土軍縣字隨聲而譌

東雍州世祖置太和中罷天平初復 按前晉州平陽郡下云真君四年置東雍州太和十八年罷然則世祖所置之東雍州在平陽此天平復置之東雍州乃在邵郡各雖同而地實異矣

安州皇興二年置治方城天平中陷元象中寄治幽州北界 按通鑑梁普通七年魏安州石離穴城斛鹽三成兵反應杜洛周衆合二萬洛周自松斫赴之卽

魏孝昌二年也則安州之陷似當在孝昌中與燕營二州之陷同時矣今攷江文遙傳稱文遙爲安州刺史善於綏撫甚得物情時杜洛周葛榮等相繼叛逆幽燕已南悉沒唯文遙孤城獨守百姓皆樂爲用卒官長史許思祖等復推其子果行州事遣使奉表莊帝嘉之旣而賊勢轉盛救援不接乃攜諸弟并率城人東奔高麗天平中詔高麗送果等蓋至是始聞安州之陷故志系之天平中也其後招其遺民寄治幽部故地迫近庫莫奚遂爲甌脫矣

密雲郡治提攜城 按漢志漁陽郡有庠奚縣孟康讀

庠爲題卽此提攜也此云郡治提攜城而白檀縣下
又云郡治則白檀卽提攜城矣漢時白檀庠本是
兩縣蓋後來省庠奚入白檀縣又移縣治于故庠奚
城也

廣陽郡 燕樂州郡治 按上文云安州治方城而此
燕樂爲州郡治則燕樂城亦卽方城矣而普泰元年
又別置方城縣蓋孝昌淪陷之後僑立此縣非卽燕
樂故地也

南汾州 按南汾州領北吐京西五城南吐京西定陽
定陽北鄉五城中陽龍門九郡志不言何時置又不

言治何城攷隋志文城郡東魏置南汾州其首縣曰
吉昌後魏爲定陽縣并置定陽郡則南汾州當治定
陽城矣卽今吉州此志有定陽郡而無定陽縣所未詳也
孝莊紀永安三年以元顯恭都督晉建南汾三州諸
軍事晉州刺史則南汾之置當亦在永安初矣

南營州孝昌中營州陷永熙二年置寄治英雄城 按
英雄城未詳所在隋志上谷郡遂城縣舊曰武遂後
魏置南營州則英雄城卽遂城也但後魏上谷郡無
武遂縣惟冀州武邑郡有之本漢縣屬河間後漢晉
屬安平後齊廢縣入武彊與上谷之武遂似非一地

東燕州太和中分恒州東部置燕州孝昌中陷以穆
羅傳攷之燕州蓋治廣甯也

天平中領流民置寄治幽州宣都城按幽州無宣都
城一本作宜都亦誤當是軍都之譌隋志涿郡昌平
縣舊置東燕州攷兩漢及晉軍都昌平各自爲縣後
魏軍都縣有昌平城則已并昌平於軍都隋文改軍
都爲昌平也

建德郡真君八年置治白狼城按世祖紀延和元年
車駕至和龍馮文通石城太守李崇建德太守王融
十餘郡來降則建德郡後燕已有之魏特因其故名

耳志無石城郡蓋并入建德矣

營邱郡正光末置按世祖紀延和元年徙營邱成周
遼東樂浪帶方元菟六郡民三萬家於幽州開倉以
賑之是營邱郡後燕所置而志以爲正光末置者世
祖滅燕之後營邱成周帶方元菟諸郡皆已併省正
光末又復置耳

蔚州永安中改懷荒禦夷二鎮置按六鎮改州魏收
史言之不詳惟懷朔爲朔州禦夷懷荒爲蔚州薄骨
律爲靈州見於本志

廓州武定元年置治肆州敷城界廓城

一本作郭城

按隋

志雁門郡崞縣後魏置曰石城東魏置廓州有廣安
永定建安三郡寄山城與此志云治敷城似不合攷
敷城石城俱肆州秀容郡之屬縣蓋隋時并敷城入
石城因附書於下也

武州武定元年置治雁門川武定三年始立州城 按
隋志雁門郡繁峙縣後魏置并置繁峙郡有東魏武
州及吐京齊新安三郡寄在城中此志之雁門川卽
繁峙郡且寄治郡城非別立州城也

地形志中

兖州後漢治山陽昌邑魏晉治廩丘 今本脫廩字

劉義隆治瑕邱 漢山陽郡有瑕邱縣劉宋元魏皆以
瑕邱爲兖州治所而不置瑕邱縣至隋始復置焉卽
今滋陽縣也

青州司馬德宗治東陽城魏因之 東陽城卽今益都
縣

廣川郡劉裕置魏因之領縣三武強索盧中水 此齊
州之廣川郡卽隋長山縣地非冀州之廣川也

太原郡劉義隆置 宋志文帝元嘉十年割濟南太山
立隋志長清縣有東太原郡卽此郡也劉宋嘗置并
州於此房法壽傳劉彧以房崇吉爲并州刺史領太

原太守治升城

太原司馬德宗置魏因之治升城有靡溝垣城 當云垣苗城史脫苗字慕容白曜傳既至升城垣苗麋溝二戍拒守不下是二城距升城不遠也麋靡音相近

潁川郡長社

按南史魯爽傳宋武帝定長安魯軌奔魏魏以軌爲荊州刺史鎮長社軌歿爽代爲荊州刺史鎮長社是魏初嘗置荊州於此志亦失書

濟州治濟北碻磈城泰常八年置 今長清縣西北有廢碻磈城

平原郡武泰中立南冀州永安中罷州 按南冀州分

冀州之清河相州之陽平濟州之平原置以路思令爲刺史永安中葛榮滅而州亦省也

南清河郡晉泰寧中分平原置治莒城 按晉世紀元有太寧而無泰寧攷房亮傳普泰中濟州刺史張瓊表所部置南清河郡乃知晉字本普字之譌又衍一寧字耳

東濟北郡孝昌三年置 按鄭輯之孝靜初除東濟北太守帶肥城戍主則郡治肥城也

光州治掖城皇興四年分青州置延興五年改爲鎮景明元年復 按呂豹子爲東萊鎮將後改鎮爲州行

光州事是光州未復之時為東萊鎮也

東牟郡孝昌四年分東郡陳留置治雍邱 孝昌以下

十三字當在陽夏郡下誤重出於此

梁州治大梁城 大梁城即浚儀城也

汝南郡 上蔡州郡治 上蔡城即懸瓠城

義陽郡永安三年置郢州天平四年罷州置 此義陽

非梁之司州蓋孝昌末即梁大通二年郢州刺史元願達以

義陽叛入於梁乃僞立郢州及義陽郡於豫州界即

隋真陽縣地隋志真陽縣舊置郢州東魏廢州置義

陽郡即此

新蔡郡晉置孝昌中陷後復治石母臺 按太平寰宇

記石母臺在平輿縣西北五十步

城陽郡太和三年置後罷武定初復 按韋珍傳破崔

慧景擁降民七千餘戶內徙表置城陽剛陵義陽三

郡以處之即太和三年置城陽郡事也剛陵義陽二

郡當與城陽俱罷故志不及之天平四年所置之義

陽與韋珍表置之義陽非一地故志不言復置也

廣陵郡興和中分東豫州置 按魏之東豫州本治廣

陵城孝昌三年州沒于梁故興和中別置廣陵郡以

招撫流民志云分東豫置不知興和之世東豫已不

屬魏矣

南陽平郡治沛南界後寄治彭城 按薛曇尚熙平二年除徐州穀陽戍主行南陽平郡事則穀陽為南陽平治所即沛南界矣隋志云彭城郡之穀陽縣後齊置穀陽郡此即舊南陽平郡所治又云彭城縣後周并沛及南陽平二郡入則据後來寄治而言

南兗州正光中置治譙城 據范紹傳蓋析徐豫二州置

陳留郡 小黃劉裕置魏因之有曹騰墓曹嵩墓鄧艾祠 此陳留郡僑置於譙郡故小黃有曹氏墓沒儀

有城父城谷陽有老子廟若梁州之陳留則漢舊郡也

馬頭郡司馬德宗置魏因之正光中陷天平中復治建平城 按漢沛郡有建平縣章懷太子云建平故城在今亳州鄆縣西北一名馬頭城

後漢書銚期傳注

即此馬

頭郡也魏時淮南北皆有馬頭郡此南兗州之馬頭領蘄已吾下邑三縣在淮北又楚州

治鍾離

亦有馬頭

郡領蘄平預二縣在淮南今懷遠縣西南有馬頭城是也

膠州永安二年置治東武陵 陵當是城字之譌

南青州治國城顯祖置爲東徐州太和二十二年改

國城通鑑作圉城胡三省云圉城當在唐沂州沂水縣界圉戶困翻子按高閻傳以本官領東徐州刺史與張儼對鎮團城劉休賓傳亦云東徐州刺史張儼所戍團城領二郡則國城當爲團城之譌或作圉城亦誤

北徐州永安二年置 此州不言治所按隋志琅邪郡舊置北徐州蓋治琅邪之卽邱矣

東楚州司馬德宗置宿豫郡高祖初立東徐州後陷世宗初改爲鎮後陷武定七年復改爲宿豫郡 按隋

志宿豫郡後魏置南徐州梁改爲東徐州東魏又改曰東楚州與此志異攷皇興元年宿豫始入於魏正始三年梁將張惠紹拔宿豫仍不能守永平元年成景雋殺宿豫戍主以城降梁自是不隸魏者四十餘年及侯景之亂始歸東魏乃有東楚州之名

高平郡治大徐城 按杜顒傳正光中遷盱眙太守帶大徐戍主疑卽此大徐也大徐城隋爲徐城縣今泗州地也

朱沛武定七年改蕭衍朱沛修儀安豐三郡置 修儀隋志作循儀

東豫州太和十九年置治廣陵城孝昌三年陷武定八年復按廣陵城今光州息縣地攷田益宗傳太和十七年奉表歸款十九年拜都督光城弋陽汝南新蔡宋安五郡諸軍事南司州刺史後以益宗既渡淮北不可仍爲司州乃於新蔡立東豫州以益宗爲刺史是廣陵城卽新蔡地矣梁大通元年卽魏孝昌三年譙州刺史湛僧智圍魏東豫州刺史元慶和于廣陵慶和舉城降以僧智領東豫州刺史自是廣陵屬梁又改爲西豫州太清元年以北廣陵爲淮州卽此廣陵也又二年有侯景之亂而廣陵又入於魏此志所云武

定七年復正其時也

義州蕭衍置武定七年內屬此州不言治所亦無所領郡縣隋志羅田縣梁置義州義城郡當卽此通鑑梁普通二年義州刺史文僧明擁所部降魏魏以爲西豫州刺史胡三省謂此義州當置於齊安郡木蘭縣界蓋以意度之未及檢隋志也汝陰弋陽二郡蕭衍置雙頭郡魏因之雙頭郡者兩郡同治一人帶兩郡守也此本汝陰郡地又僑立弋陽郡宋志所謂帖治也北陳留潁川二郡蕭衍爲陳州武定七年改置隋志

文異

魏書二

七

汝陰郡潁陽縣梁曰陳留并置陳留郡及陳州東魏
廢州卽此陳州也本雙頭郡隋志止舉陳留而不及
帖治之郡他皆類此
譙州景明中置渦陽郡孝昌中陷武定七年復置州治
渦陽城 按渦陽隋爲山桑縣今之蒙城縣也隋志
云後魏置渦州梁改西徐州東魏改譙州此志無置
渦州之文又孟表爲蕭鸞馬頭太守太和十八年據
郡歸誠除南兖州刺史領馬頭太守鎮渦陽則太和
中嘗置南兖于渦陽而志亦未之及也
伊陽郡武定二年置治伏流城後陷寄治州城 按隋

志河南郡陸渾縣東魏置伊川郡領南陸渾縣開皇
初廢郡改縣曰伏流是伏流城卽南陸渾縣也彼志
云伊川郡此云伊陽未審孰是州城不知所在據隋
志陸渾縣又有東魏北荊州則州城距伏流當亦不
遠

南司州劉彧置司州正始元年改爲郢州孝昌三年陷
蕭衍又改爲司州武定七年復改置 此宋齊梁之
司州魏正始初始得之改爲郢州其後又入於梁梁
末喪亂復爲東魏所得乃仍司州之名鄴中已有司
州故此加南字若梁之南司州治安陸與此初不相

涉

齊安郡 保城劉駿置魏因之 宋志作寶城

鄆有石城山 漢晉宋志皆作鄆

鍾離陳留二郡 灌邱有郡陽城 郡陽當是邵陽之

譌

汝陰郡州治 州治卽合肥城也宋志南汝陰郡汝陰

縣所治卽二漢晉合肥縣

南陳郡州治 此志以南陳郡爲霍州治而隋志於霍

山縣下云梁置霍州及岳安郡岳安縣豈南陳郡後

亦併入霍山乎

睢州蕭衍置潼州武定元年平改置治取慮城 元年

監本作九年攷武定紀元止于八年則以爲九年者

誤矣據下文淮陽穀陽睢南臨潼諸郡俱云六年置

則睢州之置亦當在六年字形相涉誤爲元爾取慮

城在今虹縣北

南定州蕭衍置魏因之治蒙籠城 按南史梁安成王

秀傳司州叛蠻田魯生魯賢超秀據蒙籠來降武帝

以魯生爲北司州刺史魯賢北豫州刺史超秀定州

刺史是梁時但稱定州至魏始加南字以別於中山

之定州也今麻城縣西有故蒙籠城州所領郡五而

弋陽郡為州治隋志于麻城縣下云陳置定州不知
梁與東魏已有之又不言曾立弋陽郡皆其疏也

西楚州蕭衍置魏因之治楚城 按隋志汝南郡城陽

縣後魏置城陽郡梁置楚州東魏置西楚州州蓋以

楚王城得名今息縣西有成陽廢縣一名楚子城孝

靜紀天平三年侯景攻克楚州獲刺史桓和即此州

也

件城郡蕭衍置魏因之 隋志城陽縣有梁置伍城郡

即此件城也五與午古字通

西淮州蕭衍置魏因之治豫州界白狗堆 按隋志真

陽縣又有白狗縣梁置淮州後齊廢州以置齊興郡

郡尋廢開皇初改縣曰淮川即此淮州也淮陰有淮

州故此加西字州領淮川一郡真陽梁興二縣而淮

川為州治故隋改縣為淮川而真陽名縣亦因乎此

譙州蕭衍置魏因之治新昌城 此淮南之譙州所謂

南譙州也隋志清流縣舊曰頓邱置新昌郡及南譙

州開皇初改為滁州即此

臨徐郡治葛城 徐當作滁

梁郡州治 宋志南梁郡睢陽縣所治即二漢晉壽春

縣

淮州蕭衍置魏因之治淮陰城 隋志山陽縣有後魏

淮陰郡卽此

仁州蕭衍置魏因之治赤坎城 此州唯領臨淮一郡

志以已吾縣爲州郡治則已吾卽赤坎城矣隋志彭

城郡之穀陽縣舊有已吾義城二縣後齊併以爲臨

淮縣然則梁所治仁州卽隋穀陽縣也太平寰宇記

赤坎故城在虹縣西南一百九十五里梁天監八年

置赤坎戍大同二年廢戍置仁州

九州蕭衍置魏因之治光城 此志州名相同者有兩

光州一治掖城一治光城有兩秦州一治上封一治

蒲坂辯見後有兩譙州一治渦陽一治新昌有兩義州

一寄治汲郡一不言治所有兩洛州一治洛陽一治

上洛有兩梁州一治大梁一治南鄭有兩南郢州一

治赤石關一領北遂安馮翊江夏等郡不言治所

南朔州蕭衍置魏因之治齊坂城 此州未審所在州

領梁新蔡邊城義陽新城黃川六郡攷隋志光山縣

有舊黃川郡蓋卽朔州所領之黃川矣梁無北朔州

此南字魏所加

南建州蕭衍置魏因之治高平城 按隋志殷城縣梁

置義城郡及建州并所領平高當作高平新蔡新城三郡

卽此南建州也梁時本稱建州南字蓋東魏所加以別於高都之建州也據此志新城郡乃南朔州所領不隸於南建蓋隋志之誤然卽此可證朔建二州相距不遠也

南郢州蕭衍置魏因之治赤石關 按州所領有定城邊城光城三郡隋志定城縣後齊置南郢州武定八年卽齊天保元年故隋志以爲後齊置據此志則南郢之名實始于梁也

沙州蕭衍置魏因之治白沙關城 此州未審所在今光山縣西南有白沙關與麻城縣界疑卽梁所置沙

州也隋志麻城縣有建寧郡蓋卽沙州所領之建寧

郡蕭衍傳景明四年衍將吳子陽寇白沙中山王英大破之

北江州蕭衍置魏因之治鹿城關湘州蕭衍置魏因之治大治關城 按隋志木蘭縣梁置梁安郡又有永安義陽二郡後齊置湘州後改爲北江州則湘與北江卽一州而更名據此志北江州領義陽齊昌新昌梁安光城齊興六郡而義陽之義陽縣爲州郡治湘州領安蠻梁寧永安三郡而安蠻之新化縣爲州郡治則明係兩州不可混而爲一蓋梁時本是二州魏末因梁舊亦分湘北江爲二迨後齊并省州郡以北


江入湘又移北江之名於湘爾

汴州蕭衍置魏因之治汴城 此州未審所在州領沛

汲古閣 本作汴臨淮二郡沛郡領蕭潁川相三縣攷隋志梁

郡虞城縣後魏曰蕭後齊廢又後魏置沛郡後齊廢

疑卽梁時所置汴州也



魏書二

文政十

